


M






40937


I


Vll. 3. 1.

Chas. J. May

VII. 3. 1.







VIRTUTES

THOMÆ

OBORSKI,

Episcopi Laodicensis.

SVFFRAGANEI

ET

CANONICI

CRACOVENSIS.

*Imitationi Fidelium exposita: be-
neuolo & humili obsequio,*

P. STANISLAI KVKLINSKI
Societatis IESV.

CRACOVIAE, Ex Officina
SCHEDELIANA. S. R. M. Typ:

VIRTVTES

THOMAS

OBORSKI

Episcopi

SVETI



40934

CAMONICI

GRACOVENSIS

Imitationi Picturam expressit: de-
novo et huius obsequio

T. STANISLAVSKIN

Societas 1857.

GRACOVIE, Ex Officina
SCHEDERIANNA, S. R. M. 1857



PERILLVSTRI

Ac

REVERENDISSIMO DOMINO,

D. NICOLAO

O B O R S K I,

EPISCOPO LAODICENSI,

Suffraganeo, Schola-

stico, Vicario in Spiritua-
libus & Officiali Generali

CRACOVIANSI &C.

DOMINO, PATRONO,

Ac Benefactori Colendissimo.



*Ecimus agitur annu-
cum meâ, quali quali
operâ, tuis autem im-
pensis, prodierat in lu-
cem narratio virtu-*

(2)

tum

tum Sancta memoria THOMÆ
OBORSKI, Genere Patruī, offi-
cio antecessoris Tui. Intra quod
spatium, quantumuis numerosa li-
belli exemplaria, ad eam paucita-
tem deuenēre; ut cum non deessent,
qui ea requirerent; deesset, quo
quirentium desiderijs satisfaceret.
Visum proinde est pietati Tuae, ut
nec Tu sumptui, nec ego labori ite-
ratō parcerem: praesertim quod ex
Actis THOMÆ partim imitandis,
partim admirandis, non nulla tem-
pus post aperuerit, quae antea nos
latebant. Sed & errata quadam
in priorem editionem irrepserant;
in hac secunda corrigenda. Prodit
igitur libellus mole voluminis quo
facilius circumferri possit, priore
exilior, rerum accessione auctior;
adeoq; gratior futurus cum Tibi
tum Venerabili Principis Ecclesiae
Collegio, cui suum olim Collegam
& quo

Et quo sanctius, eò insignius nobi-
lissimi Collegi decus, posterorū me-
morie plenius cōmendari, non pote-
rit uti spero, non esse pergratum.
Caterū supplico Diuina bonita-
ti, ut quoniam, quem ego utcunq;
adumbraui calamo, Tue egregiè ex-
primis imitatione, magna intuen-
tium adificatione, magno Illustris-
simi Antistitis, Sacrisq; Collegij so-
lacio, magno totius amplissima Di-
acefeos emolumento, magno Tuorū
apud DEVM meritorum incremen-
to: quæ hæc tanta bona in multos u-
bertim proueniant annos, incolumē
Te & donis gratiæ suæ cumulatis-
simum quàm diutissimè præstet.

Perillustreis ac Reuerendissimæ Do-
minationis Vestræ,

Seruus humillimus

STANISLAUS KYKLINSKI,

Societatis IESV.

(8) PRO-

PROTESTATIO AUCTORIS.

A Postolico decreto, die 13. Martij 1625. edito, de non imprimendis celebrium Sanctitate hominum vitis; eiusdemque decreti decreti declarationi, 5. Iunij 1631. & Confirmationi, 5. Iulij 1634. factæ; obseruantia. ac reuerentia, quâ par est, insistendo; profiteor: narratione virtutum THOMÆ OBORSKI Episcopi Lâôdicensis Suffraganei & Canonici Cracouiensis; non me id agere, vt opinionem illi sanctitatis arrogem: aut cultum conciliem religiosum; gradumue struam: ad solennes ipsi in Ecclesia decernendos honores: aut quæ narro, velut ab Ecclesia approbata lectori exhibeam: potiùs omnia, non aliter accipi velle; quàm quæ humanâ dumtaxat authoritate nituntur.

Facule

Facultas & Approbatio
Reuerendi Patris Præ-
positi Prouincialis Soci-
etatis IESV per Po-
loniam

Librum, de virtutibus THO-
MÆ OBORSKI, Episcopi
Làódicensis, Suffraganei Cracoui-
ensis. &c. à P. STANISLAO
KVKLINSKI, Nostræ Societa-
tis Sacerdote, conscriptum, & à
deputatis, ad id, Theologis, le-
ctum, & approbatum, concessa mi-
hi, ab Admodum Reuerendo Pa-
tre Nostro IOANNE PAVLO
OLIVA, Societatis Nostræ Vi-
ceprapósito Generali, potestate,
typis mandari, permitto: scita illis,
ad quos pertinet videbitur.

Cracouia in Domo Probationis 27. Decem-
bris Anno Domini 1663.

MARTINVS OLSZÉVSKI, m. p.

Censura & Approbatio
Prioris editionis.

Admodum Reuerendi Domini.
in Diacesi Cracouiensi Libro-
rum Censoris.

Virtutes Thomæ Oborski
Episcopi Laodicēsis &c.
à Reuerēdo Admodum Pa-
tre STANISLAO KVKLIN-
SKI Societatis IESV Theo-
logo imitationi Fidelium
propositas, ideā rectè dixe-
ris Episcopalis vitæ, ac mu-
neris: dignam imitatione,
dignam posteritatis memo-
ria, dignam publicâ luce.
Luxit hic DEI Sacerdos in
Ecclesia, vitæ ac morum
inno-

innocentiâ singulari, eximiâ
pietate, in adimplendo Suf-
fraganei officio summâ soli-
tudine. Luceat & hoc pio
scripto posteritati: clarissi-
marumq; virtutum suarum
quàm plurimos habeat æmu-
latores. Ita voueo, scriptum-
que præsens in lucem edi-
permitto. Anno 1663. Die
6. Octobris.

HYACINTHVS LIBERIVS

*S. T. D. Præpositus SS. Cor-
poris Christi Canonic: Regul:
Librorum in Diœcesi Crac:*

C E N S O R.

A P-

APPROBATIO.

Posterioris editionis.

Perennant feliciter eximiae
virtutes piæ memoria Reue-
rendissimi Thomæ Oborski Epi-
scopi Laodicensis, Suffraganei
& Canonici Crac: perseverat
in animis hominum grata illa-
rum recordatio, addit non me-
diocre fomentū, iteratum hoc
cum auctario scriptum, cui vti
& priori editioni parem ap-
pono Censuram & Approbati-
onem, ac in lucem ire permitto.
Anno Domini 1673. Die 23.
Iunij.

HYACINTHV: LIBERIVS S. T. D.

Præpositus SS. Corporis Christi Ca-
nonicorum Regulæ Librorum

CENSOR.

I N-

INDEX CAPITVM.

- Caput 1. Patria, genus, electio, stat^{us}.
Caput 2. Deuotio in Deum.
Caput 3. Conformitas cum Diuina
volūtate.
Caput 4. Fiducia in Deum,
Caput 5. Deuotio erga V. Dei Ma-
trem & Cælitēs.
Caput 6. Humilitas.
Caput 7. Contemptus honorum.
Caput 8. Patientia.
Caput 9. Magnanimitas.
Caput 10. Mortificatio.
Caput 11. Castitas.
Caput 12. Labores.
Caput 13. Zelus animarum.
Caput 14. Misericordia & Liberali-
tas in pauperes.
Caput 15. Iustitia.
Caput 16. Infirmi prodigiosè curati.
Caput 17. Alia quædam admiranda.
Caput 18. Mortui vitæ redditi.
Caput 19. Obitus.
Caput 20. Opinio Sanctitatis.

Præ-

Præfatio.

NArrationem Virtutũ Thomæ Oborski texere institui: de uexâ iam etate: maioreque animo quàm viribus Verùm ut cetera defint; certè nec diligentia defuit in inquirendis: nec fides deerit in scribendis: quæ ex familiaribus Thomæ Præbyteris, qui ei plures Annos conuixere, tum alijs fide apprimè dignis, cognoscere licuit, Causa susceptæ operæ, præcipua; Maior gloria Dei: laudabilis in Sanctis suis: tum communis Ecclesiæ utilitas. Enimuerò Thomas, quoad in terris egit, perpetuo vitæ integer-

Præfatio.

tegerimæ tenore, crebrisque
interim heroicarum virtutum
actibus, tot ac tam præclara
solide sanctitatis specimina e-
didit; ut vitæ eius, idea quæ-
dam Diuinitus proposita vide-
atur; ad quam huius sæculi
homines, & in primis Clerus
secularis æmulâ Sanctimonie
imitatione sese componerent.
Accessère haud leuia incitamen-
ta: Eximius Thomæ, sibi que
constans semper, erga Societa-
tem animus: tum erga domum
Professam Crâcouiensem, (cui
interim indignus præsum;) be-
neficientia singularis. Nam com-
mune

Præfatio.

munere natale solum; & si quis
est alius nexus sæculi; abiuncto
mihi ab sæculo, in minimis
sunt. Sed & illa subiit ani-
mum cogitatio; quantumvis
in Societate, uti scriptores, ita
scribenda, DE I munere, non
desint; condecere tamen, ad
alterius quoque Ordinis, &
quidem in Ecclesiâ primarij
decora, tinctum in charitate
extendere calamus: ne nobis
solum ipsis placere, nostraque
celebrare videamur. Porro
vitam serui DE I, non per
spatia ducam temporum: nec
numero, ac varietate distin-

quam

Præfatio

quam functionum: longum id,
& operosum magis, quam vti-
le foret: sed certo ordine, di-
gestam seriem, contetam vir-
tutum: primùm quidem ea-
rum, quæ animum ad DEVM;
Deoque proxima; tum quæ in
semetipso: demum ad proxi-
mum; ritè componunt. Quan-
quam virtutum is genius est;
adeoque sui inuicem (vt ita di-
cam) amantes, ac veluti mutuo
complexu innexæ sunt; vt vix
aliqua narranda sese offerat;
quin alterius poscat mentio-
nem.

Particularibus me morâdis
maxi-

Præfatio.

*maximè infisto; quia hæc imi-
tationi opportuna magis. Pri-
mùm ac potissimùm immoror
imitandis: admiranda; vti ve-
ra æstimatione sunt; ita
loco postrema
erunt.*



CA.



C A P V T I.

*Patria, genus, electio, status,
ex more præmittuntur.*



Atale solum Thomæ,
ea pars Regni Poloniæ fuit,
quæ Ducatus Masouiæ ap-
pellatur: Prouincia egregiè Catholi-
ca, & Hæreticis semper infesta; ut
hoc, inter beneficia Thomæ Diuini-
tus concessa, meritò numerandum sit,
quòd in Catholicissima gente ex Pa-
rentibus Catholicis nato, à primæ
mox vsura lucis non licuerit non esse
Catholicum. Parentes claritudine ge-
neris præsignes: Pater Procopius de
Obori, Pocillator Oerscensis, ex præ-
lustri & perantiqua Columnarum fa-
milia, quæ ex Italia in Poloniam cum
Hannone Columna, Archiepiscopo
Gnesnense, sub Miecislao Principe

3
traducta, velut generosa stirps in ali-
ud translata solum, non equestris solū;
verum etiam Senatorij ordinis togā,
fago, Pontificalibus tiaris insignes
protulit viros. Mater Catharina Ło-
sia Castellani Visogrodensis filia. Nec
verò huic decori diutius immorandū
quod cū cæteroqui mundus faciat
magni, humilis seruus Dei pro mini-
mo duxit.

Puer sortitus animam bonam, vbi
inter bonas artes in pietatis & litera-
rum gymnasijs adoleuit, quò arctiūs
se cultui Creatoris sui adstringeret, sa-
cris initiari voluit. Ac primo Canoni-
cus Cracouiensis ad Principem Basi-
licam Cathedralē; deinde, crescen-
te de eo virtutis cæteræq; dignitatis
opinionē, inuitus quidem, mul-
tumq; vt suo narrabo loco, re-
luētans, Episcopus Laodicē-
sis, ac Suffraganeus Cra-
couiensis crea-
tus est.

C A P V T II.

Deuotio in Deum.

MERITO sanè insignia virtutum viri Dei in medium producturi, ab eâ potissimum seriem narrationis ordimur, quæ (*vt ait Ambrosius*) ordine prima est, & fundamentum cæterarum. Tametsi autem deuotio strictè sumpta; illa dumtaxat nobilissimæ omnium moralium virtutum Religionis pars sit, quæ Theologis definitur; parata, pròptaq; voluntas exequendi ea omnia, quæ ad cultum Dei pertinent; nihilominus, hîc eam, ex communi iam acceptione, latius sumimus: prout alia etiam virtutis Religionis officia complectitur. Eius verò, per totam vitam luculenta Thomam specimina edidisse, ex fide, qui nouerunt, memorant.

Meditationi, quæ est causa interna, ac fomentum veræ deuotionis, quotidie, seu domi esset, seu in itinere, horam integram impendebat; proie-

ctis vt plurimùm in terram nudantur
genibus; ac citra vllius fulcri admi-
niculum. Quo verò materia paratio-
re, methodoq; ordinatiore in medi-
tando vteretur, habebat semper, seu
domi, seu peregre esset, ad manum;
Ludouicum de Ponte. Cuius diuina-
rum commentationum liber, tam
ipsi familiaris erat, vt quoties, certas
pro ratione præscripti temporis Ec-
clesiasticarum precum parte absolu-
tâ, diceret; Da mihi librum; pueri
gnari consuetudinis eius, haud ali-
ui porrigerent, quàm Ludouicum de
Ponte. Exercitijs spiritualibus San-
cti Ignatii, quotannis in Domo Pro-
fessa Societatis IESV duas circiter
hebdomadas, singulari diligentia a-
nimum excolebat.

Vti meditationi, atq; examini cō-
scientiæ, quod bis in diem faciebat,
ita Horis Canonicis recitandis, quo-
ties opportunitas loci aderat, in secre-
to, clausoq; cubiculo vacabat: ac si
quis

quis cum Deo ita agenti importuniùs
interuenisset, acrids sanè commoue-
batur: indignum ratus; Deum dese-
rere, vt homo hominem alloquatur.
Quo in genere, quid sibi adolescenti
accidisset, solùm tunc Minoribus Or-
dinibus initiato, ac nec dum exactio-
ri modestiæ Clerum addecenti, assue-
to; narrauit mihi Adamus Zelichen-
ski, iam tunc Canonicus Culmensis,
ac Generalis Officialis Pomesanien-
sis. Missus eram (inquit) à quodam
Prælato, ad Reuerendissimum Suf-
fraganeum. Occluso tunc ipse pro mo-
re ostio, Horis Canonicis dicendis in-
tentus erat. Admitti importuniùs po-
stulaui: pulsaui fores liberaliùs: tum
ille aperto ostio, ac vultu in seuerita-
tem verso: quidnam hoc? quid agi-
tur? nunquid Cracouia ardet? mini-
mè, inquam: curnam igitur me vtiq;
cum Deo agentem, tam imporrune
interpellas? Pudefactus adolescens,
ad breue tempus ruborem passus, ad

longum retulit, haud vulgare dignè
Deo cum Deo agendi exemplum.

Nulla non die, Sacrificium incru-
entum offerebat, etiam cum aduersâ
valetudine conflictaretur præterquâ;
si vi morbi oppressus, præ debilitate
pedibus consistere non posset: tunc
verò: ne communi fidelibus sacrificij
fructu careret; impetratâ ab Episco-
po licentiâ, domi suæ audiebat Mis-
sam. In itinere sicubi copia Ecclesiæ
non esset; diuertebat sacri habendi
causâ ad Ecclesias etiam longè distan-
tes. Cùm domi ageret; ordinariè sa-
crum faciebat in Ecclesia Cathedrali
ad effigiem sculptam Saluatoris Cru-
cifixi: alloquio Beatæ Hedwigijs, ali-
isq; miraculis celebrem. Sacrificabat
porro vultu ad deuotionem mirè cō-
posito, atque (vt testatur eius à sacris
Minister) nunquam sine lachrymis.
Præcedebat sacrum, accurata semper
præparatio, nec minùs deuota seque-
batur actio gratiarum: quo tempore

neminem volentium alloqui, admirabatur: dicēs, sibi modo cum Deo solo agendum esse, seu ministraret, seu perciperet sacramenta, singulari id pietatis sensu, diligentia, reuerentiâq; faciebat. Quo studio puritatis, ac tene-ritudine conscientiae fuit, leuissimas etiam noxas, seu potius noxarum umbras, minimè patientis; confitebatur quotidie: & nonnunquam pluries in diem: Accedebat porro ad Sacerdotem palam: spectante populo, & tanquam vnus ex populo, gratâ cuiusdam simplicitatis, demissionisq; ad populum commendatione: ac spectatium ædificatione. Sacerdoti comiter roganti, vt quoties confiteri vellet, euocari se potius faceret ad Sacrarium, quàm confertæ misceretur multitudini; respondebat quod Christus Ioanni: *Sine modò: sic enim decet nos implere omnem iustitiam.* Non deerant, qui tam frequentem exomologesim minùs probarent; verùm ita senti-

sentientes, & celebrium sanctitate ho-
 minum exempla, & ratio obuia confu-
 tat. Nimirum, si citra iustam repre-
 hensionem manus in diem sæpius ab-
 luimus, cur non maculas animæ? præ-
 fertim quòd ob corruptionem natu-
 ræ, mentisq; humanæ mobilitatem,
 citius ferrè animæ maculas, quàm
 corporis contrahimus: attestante elo-
 quio Divino: *Iustus septies cadit &c.*
 Erga Christum, in horto pridie pas-
 sionis orantem, peculiari ac pertene-
 ro pietatis ferebatur affectu. Ad eius
 imaginem, venerabundum procum-
 bere; eam, quoties cundo redeundo
 inambulabat, in quolibet accessu pijs
 osculis premere; vsitatissimum Tho-
 mæ fuit. Atque inde, cernere
 erat imaginem, ex multo
 oris attactu, contracto
 squalore horridulam,
 at multæ pietatis
 vestigijs gratio-
 sam.

C A P V T III.

Conformitas cum Diuina voluntate.

Celsiorem assequi dignitatem, formam nancisci beatiorum potest nemo, quam ut fiat amicus Dei. alius, quo Sancta ambitio connitatur, non habet. Porro amicitiam humanam in consensione voluntatum, sitam esse, verissime censuit Sapiens Ethnicus. Eadem, inquit, velle, & eadem nolle, ea demum firma amicitia est. Nec verò alia est ratio amicitie Diuinæ: Ex omnium sapientum Christianorum sensu, consistit & illa, in humanæ voluntatis cum Diuina consensu: quem vulgò Conformitatem appellamus, virtutem tam intimam amicitie Dei, ut quicumq; eam polleat, nefas sit dubitare, esse amicum Dei. Huius igitur tam beatæ sortis, haud exsortem fuisse Thomam, dicta pariter & facta ipsius, abundè docuere. quæ quidem quis omnia recenscat?

As vnum

unum & alterum sint specimen reli-
quorum. Homo ab omni iactantio
alienissimus, auditus est aliquand-
dixisse: sibi nihil non ex animi senten-
tia, votoq; cedere: planeq; nihil vn-
quam euenire nolenti. Mirantibus; qui
id in tantâ rerum humanarum incon-
stantiâ, euentorumque nunc lætorum,
nunc tristium varietate fieri posset?
respondit: absit equidem, vt ego quid
quam velim, nisi quod vult Deus. At-
qui, si demas peccatum, omnia seu
aduersa, seu prospera fiunt volente
Deo; igitur & me volente.

Numeroſum pecorum gregem ab-
ſumpſerat Thomæ peſtilens lues. Frō-
te ille exporrectâ, ſolitoq; amæniore
vultu, ingreſſus ad Collegam; (is erat
Eraſmus Kretkowski in paucis ami-
cus Thomæ) amplexatusque eum, Ob-
ſecro, inquit, Frater mi dulciſſime,
age gratias Deo pro ſingulari beneficio
mihi nunc præſtito. Quærenti quod-
nam illud eſſet? reſpondit: omnia mi-
hi pe-

hi pecora pestis sustulit. Fecit me Dominus Iobum: non aliud ergo dicam, quàm quod ille: Dominus dedit: Dominus abstulit: Sit nomen Domini benedictum. Tam absoluta numeris omnibus cum Dei voluntate consensio, in magnam rapuit admirationem Collegam: reputantem videlicet secum; parum fuisse Thomæ tantam rerum suarum iacturam in æquo animo tulisse; nisi etiam tulisset læto; nisi iacturam in beneficio ponens, gratias egisset Deo; nisi alios quoq; ad agendas inuicasset.

C A P V T IV.

Fiducia in Deum.

Vluax fides de Prouidentiâ Dei, quòd quæ condidit, gubernet; & quidem non minorem impendens curam singulis, quàm vniuersis; aut minimis, quàm maximis; quòd pro omnipotentia suâ, nihil non possit, & qua sapientiâ est, melius nouit, quid nobis

nobis conducat: & quâ bonitate, bene uolentior, fauentior, ac melior sit nobis, quàm nos nobis; Hæc inquam, veritatibus fidei constabilita persuasio, pariebat in Thoma illam insignē fiduciam, quâ velut carissimus filius, in sinu optimi & potentissimi Patris positus, securus agebat, omnem sollicitudinem proijciens in eum, cui nec facultas prouidendi sibi de omnibus bonis, nec voluntas deesset.

In tantâ assiduitate, contentioneq; laborum, quos in conferendis Confirmationis, & Ordinis Sacramentis; ac præsertim consecrandis Ecclesijs, altaribus, campanis, haud modicos esse constat; contingebat identidem, vt lassum corpus viribus destitueretur, ac febriles pateretur alterationes. neq; tamen idcirco à cæpto opere desiste-
 bat. Cumq; comites commiseratione ducti hortarentur, vt nonnihil interim quietis caperet, haud satis æquo animo videbatur excipere miserentium

serentium voces. tum fiducia in Deum erectus dicebat: equidem suppeditabit mihi adhuc Deus vires. nec fiducia irrita stetit. breui enim ægroscenti corpori, valetudo vigorque redibat. Cùm ea res comitibus admirationem ciceret, leniter increpitans eos, modicæ fidei arguebat.

Peragrando Diæcesim, ingressus erat Thomas regionem asperis montibus, ac resquis horrentem. Rogationum dies tum proximè imminabant. Hic metuere comites, ne non suppeteret illis conueniens pro ratione temporis cibis, attentâ locorum conditione piscinis carentium, esum piscium desperauerant: palamque, quod in simili Apostoli dicebant: Quid hîc manducabimus? Respondit Thomas verbis Domini: *Quando misi vos sine sacculo, & perâ, nunquid aliquid defuit vobis?* Hisce tum, & alias erigebat suorum animos. Ac sanè, quod discipuli Domino respōderant, nihil

nihil sibi defuisse; hoc idem ipsi experti sunt: tantâ eo loci nobilissimorum piscium affluente copîâ; quantum nusquam alias meminissent.

C A P V T V.

Deuotio erga Virginem Dei Matrem, & Calites.

POST Deum, erga Deiparam. eximie affectus fuit: cuius vel sola mentio pias lacrymas illi ciebat. Florebat tunc, ad sacram Diuæ Barbaræ ædē, Assumptæ Deiparæ, Nobilium dicta, Congregatio: Sigismundi III & Vladislai IV. Regum, Bernardi Maciejowski S. R. E. Cardinalis, Nunciorum S. Sedis Apostolicæ; plurimorum tam Ecclesiastici, quam secularis status Regni Senatorum, aliorumq; dignitatibus & Officijs eminentium personarum, nominibus in eadem datis, & pietate inclyta. Eidem Thomas, quod stabilius cultui Deiparæ sese manciparet; dato nomine; mirum, quantum

quantum sodalibus egregiæ pietatis erga Deiparam, cæteræq; Sanctitatis exemplis præluxerit. Quare eum præoptabant, & quodad per occupationes id oneris ei subire liceret, preligebant suæ Congregationis Præsidentem. Quater creatum, in Albo Congregationis reperio. Rosarium B. Virginis, quasi assiduè manibus tractabat: seu domi seu in Ecclesia; ijs etiam cantatarum à se Missarum interstitijs, quæ musici concentus sibi vendicant. Atque ex hoc per frequentem, sperq; pio precatoriorum globulorum usu profectum est, quod à pictoribus vulgò specie orantis manibusq; ad pectus compositis corollam Beatæ Virginis tenens, ac veluti versans, pingatur. Horariæ laudes, vulgò Officium B. V. nuncupatæ, quotidianum erant tributum, quod Dominæ suæ exactè pendebat.

Dies ex Ecclesiæ præscripto Deiparæ cultui dicatos, præcipuâ traducebat.

bat veneratione: nullum sanè præter-
mittebat, quin cum alijs pijsſimis ob-
sequijs, tum cantatâ solennî ritu ha-
bituq; Pontificio Miſſa, redderet ce-
lebriorem.

Loca beneficijs Potentiſſimæ apud
Omnipotentem filium Matris ſuffra-
gatione obtentis celebria, peregri-
nationibus, donarijs, cæteroq; cultu
proſequabatur. Myſlenicijs extat
imago B. V. ſudore ſupra vim natu-
ræ profuſo, impendentium regno ma-
lorum prænuntio, vt credebatur, indi-
ce celebris. quod quidem miracu-
lum ſerio examini ab officio legiti-
mo ſubiectum & approbatum fuit. Eo
diuertens Thomas deuotionis pariter
erga B. Virginem & humilitatis a-
ctum exercuit. Nam Sacrificium in-
cruentum ad imaginem obtulit, clam
verò donarium liberale pluteo ima-
ginis ſubiecit. Quod cum nihilominus
curioſior quidam actorum eius ob-
ſervator præſbyter Religioſus aduer-
tiſſet

tisset, admonendum curionem putauit, veritus ne oblatio argentea Sacri-legi ausûs cuipiam præberet ansam.

Sanctos, eorumq; Reliquias impensè venerabatur, & vt frequens ei erat in consecratione altarium earum vsus, peculiari cautelâ, reuerentiâque tractabat. Præcipua illi in æstimatione, amoribusq; fuit, Crux sacris reliquijs grauida, olim insigne Pontificiæ dignitatis, S. Caroli Borromæi, à quo donata Stanislao Hosio, S. R. E. nominatissimo doctrina & pietate Cardinali, ad Martinum primò Cromerum, in Episcopatu Varmiensi Hosij Successorem; tum ab hoc ad Paulum Dąbski, Suffraganeū Cracouiensem; demū ad proximū Pauli Successorē, Thomā Oborski, peruenerat. Eam hoc tempore, tertius à Thoma in Suffraganei munere Successor, eiusdemque nepos, ac virtutum æmulus, Nicolaus Oborski; cum ob ipsorum sacrorum pignorum, tum tantorum

rum virorum, quibus in usu fuit, Sanctitudinem, ac venerationem, in The-
sauro Ecclesiæ Cathedralis asseruari
voluit; non nisi pro Solemnioribus
actibus ad usum Suffraganeorum pro-
mendandam.

Quotidie manè, adibat Ecclesiam
Cathedralem, eaq; propter studio
elegerat ad habitandum arcenes
ædes, templo propinquas. Atq;
ut est, ea Basilica Stanislai Martyris,
&, qui cum raræ Sanctitatis opinione
vixerunt, & decesserunt, Ioannis Grot,
Prandotæ, Cracouiensium item Epi-
scoporum, sepulchris, alijsq; præte-
rea plurimis, & nobilissimis Serua-
toris nostri, & Sanctorum Reliquijs
inclyta, nunc hæc, nunc illa vene-
rabundus adibat sacra monumenta:
prout spiritu deuotionis agebatur:
cuius impulsu, non rarò se ab confes-
su Collegarum repente subducens, ad
aliquod sacrorum pignorum, genibus
accidebat.

Humilitas

HActenus superioribus capitibus
 proſecutus ſum, eas Thomæ vir-
 tutes, quæ peculiari ratione Deum ac
 Cælites reſpiciunt. Iam verò ex ijs,
 quæ hominis animum in ſe ad ſe, ritè
 componunt; nec tam alijs, quàm ha-
 bentì proſpiciunt, meritò prima ſeſc
 offert, quæ eſt fundamentum cætera-
 rum: ea ſcilicet temperantiæ pars
 quæ modū appetitui excellētiae ponit,
 & vulgò iam, ſolis, quoad ſciam,
 Chriſtianis uſurpato vocabulo, Hu-
 militas appellatur. Virtus Diuinæ,
 & humanæ gratiæ conciliatrix, è cæ-
 lo in terram cæleſtiū donorum copi-
 am euocans, ad ea capienda animæ:
 dilatans ſinus, ac demum Spiritui ſan-
 cto, in corde hominis, quietiſſimam
 ac tutiſſimam præſtans ſtationem.
 Hac igitur ſpiritualium præcipuè cō-
 modorum tam feraci virtute, haud fa-
 cile dixerim, quantum præſtiteri, ali-

isque præiuerit Thomas Ex profun-
 da proprii nihili cogitatione orta, ac
 frequentissimis actibus, in habitum,
 & veluti in naturam versa, congeni-
 ta illi esse videbatur. Eam porro ipse,
 factis semper magis quàm dictis ex-
 hibuit. Quæcunque æstimationem
 sui parere poterant, norat constanti
 silentio tegere: laudes suas non solùm
 pronis auribus non excipere, sed &
 laudatores auersari: quidquid boni;
 studio, ope, opera eius effectum esset,
 Deo ex integro tribuere: Eleemosy-
 nas liberales, quoad posset, largiri
 occultè, vt planè nesciret sinistra,
 quod faceret dextra: pauperes comi-
 ter affari; non à personis; non ab
 occupationibus vilibus abhorrere.
 Ipse cubiculū, ipse luto perlitos, cal-
 ceos, proprijs manibus purgabat:
 pueris interim sopore oppressis pro-
 ductiorem indulgens somnum: eò
 quòd diceret eos, dormiendo potissi-
 mùm crescere. Non rarò, iam Episco-
 pus

p^r, suas ipsemet farciebat vestes, quod cum in diuersorio quodā fecisset; (vestimentum quoddam humiliter refecerat;) & acum commodatō ab hospite acceptam restituere oblitus, viā se dedisset: i.e. aliquot posteaquam milliaria iam contecisset, animaduersa; continuō acum per famulum equitem remisit: ne vel minimum, quid, penes se remaneret alieni. Minuta hæc cuiquam, aut etiam risu digna, videri possint; ijs præsertim; (vt quidam rectus æstimator rerum in simili ait:) qui in profanis historijs, euersiones Regnorum, excisiones urbium, oppleta classibus maria, constratos cadaueribus campos, cruoris flumina legere assueti, dum huiusmodi facinora, velut sola magna, suspiciunt, quid aliud quam grandia scelera mirantur? Nam qui è disciplina Christi, veri æstimatores prodeunt; sole veritatis æternæ, puras eorum mentes desuper illuminante, nequa-

B, — — — — — quam

quam minima esse ducunt, quæ maximarum virtutum (vti hîc humilitatis & iustitiæ) effecta iuxta, ac documenta existunt. Sæpè minuta in superficie terræ auri ramenta, grandes intus reconditos thesauros indicant: & profani etiam iudices, non minùs in subtilissimis operibus, quàm in vastis molibus, eximiorum artificum, & præstantiam agnoscunt, & celebrant encomia.

Cultus corporis, non rarò indicat, vel tumorem, vel modestiam mentis. Medius quodam modo erat Thomæ: vt nec squalore inusitato, nec exquisito nitore, hominum oculos in se conuerteret. Materies amictus Episcopalis, intra decorum status, infimi pretij. Serici pretiosioris vsum studio vitauit, quòd diceret Episcopum haud decere. Vidi præsentatam mihi ab Reuerendissimo eius nepote, Iohannam; meritò inter sanctioris memoriæ pignora referendam, cum

cum ob Sanctitatem viri, tum ob
 qualitatem materiæ, modestiæ indicē.

Hanc ego postea vestem ab Reue-
 rendissimo Nepote impetratam S.
 Petri Collegio, Rector tunc eius ap-
 plicui & in Sacrario Basilicæ repolui
 vlitus à Deo ordinatis seruituram.
 Dedi eidem eiusdem cingulum Episco-
 palem, cuius post diuturnos & acerr-
 mos calculi cruciatus applicatione,
 me ex integro sanatum inferius Cap:
 16. libenter recognoscam. Dedi præ-
 terea duas epistolas, vnam ad Vladi-
 slaum IV. Poloniæ Regem; alteram
 ad S. M. Patrem Nicolaum Lancici-
 um tunc Collegij S. Petri Rectorem,
 vtramque manu ipsiusmet exaratam.
 quarum occasione adieci insuper
 complures P. Nicolai Lancicij literas
 ad me ex varijs locis datas, vt pote
 sanctitatem spirantes. Faciat

Dominus cum his quod
 ipsi è re maioris gloriæ
 suæ visum fuerit.

Contemptus Honorum.

HV militatis matris gloriosa proles, testisque veracissimus, honorum contemptus, specialius in Dei seruo enituit: quippe qui rarissimo exemplo, quo omnem ambitioni ad se aditum præcluderet, votum emisserat, non admittendi vllas vnquam Ecclesiasticas dignitates, quod quidem votum solo Deo conscio factum, qua occasione postea patuerit, libet hic attexere, ex Annaïibus Congregationis Beatæ MARIÆ Virginis Assumptæ, in Domo Professæ Cracouiensi, Societatis IESV ad Ecclesiam S. Barbaræ, dudum erectæ. Librum hunc miles Succus, expilando Dommum Professam, inter ceteram prædam rapuerat: atq; vt erat, & magnitudine & elegantia visendus; multâ præsertim in auratione splendidus, redimendum Cui Catholico obtulerat. Disceptatum aliquandiu de pretio:

tio : securi intentatâ minitari Suecus,
 in partes minutas se librum lectu-
 rum, ni postulata pecunia numeraretur.
 Conuentum tandem de pretio,
 auctiore nonnihil, quàm primitus Ci-
 uis obtulerat verum longè inferio-
 re, quam aut valor rei, aut cupiditas
 militis flagitabat. Demum, post ali-
 quot annorum interualla, prætereun-
 ti fortuito, Sacerdoti Domus Profes-
 sæ, beneuolè à Ciue oblatus liber,
 suauî Diuinâ prouidentia opportunè
 disponente, eò ipso plane tempore,
 venit in manus meas; quo mox
 hancce virtutum Thomæ enarratio-
 nem cæperam. quippe vix aliquot
 paginas, leui contentorum animad-
 uersione, euolueram, cùm incidi in
 titulum præfixum, hisce disertè ver-
 bis. (Insigne demissionis animi e-
 xemplum, datum omnibus ab Peril-
 lustri & Admodum Reuerendo Do-
 mino Congregationis nostræ Præfe-
 cto, dum Suffraganei & Officialis.

Generalis Cracouiensis honorem sibi delatum pro posse fugeret;) tum facti subsequitur narratio quam vti diffusorem contractiore nonnihil adstringo stylo.

Illustrissimus & Reuerendissimus Antistes Cracouiensis Petrus Tylicki, vir magni iudicij, & vineæ sibi diuinitus creditæ peruigil custos, cultorq; perstudiosus, cum diu multumque secum deliberasset, quemnam sibi Suffraganeum & Officialem in locum defuncti deligeret, negotio Deo, per se, & Religiosos viros commendato; vtramq; dignitatem Thomæ Oborski detulit. qui gratijs actis. respondit: se dudum firmiter apud se statuisse, nullam dignitatem Ecclesiasticam admittere: viuere se, porroque victurum præsentis sue sorte contentum. Repullam Antistes passus, iam aliò verterat curam. nec deerant, qui pro se vtramque dignitatem sollicitè ambirent. Sed
cùm,

cum, Deo ita ordinante, variarum
interuentu circumstantiarum, diu ni-
hil fixum statueretur, nec ultra co-
natum res procederet; factum est;
instructu, ut creditur, Dei; qui lucer-
nam hancce nequaquam sub modio
latere, sed in candelabro dignitatis
Ecclesiasticæ expositam omnibus lu-
ceræ voluit: ut Antistes pristinas co-
gitationes. studiumq; resumeret. Ita-
que vâlidum ad expugnandum Tho-
mæ animum arietem adhibet, dire-
ctorem conscientiæ eius. Iserat Pa-
ter Fridericus Schembek Societa-
tis IESV Theologus, idemq; Pater
dictæ nobilium Congregationis, vir
propriæ iuxta, & alienæ perfectionis
perstudiosus: tractatione armorum
Spiriualium, præcipuè exercitiorum
S. Ignatij, institutione spiritali iu-
uentutis, crebris inde animarum lu-
cris celeberrimus; ut vulgò appella-
retur, vernaculo quodam vocabulo.
Tapidusa, quod Latinè venatorem seu
aucupem

aucupem animarum verteris. Is igitur ponderosis rationum momentis, Thomam aggressus, pressius institit, ne dignitates ab Antistite, solo maioris Ecclesiæ boni intuitu oblatas, defugeret; neue eas, ut honores, sed ut onera pro maiore Dei gloria portanda subiret; demum religione tangeretur, si Deo legitimè per Superiorem vocanti, resisteret. Ad iteratum, de quo iam minimè cogitabat, insultum, exhorruit Thomas. Tum collecto animo, ne te, inquit, pluribus occupè, teneamque suspensum; scito me, emissio voto, omnem mihi aditum ad Ecclesiasticas dignitates præclusisse: Christi, in honorum fugâ, vestigijs velle insistere: ab Creatore in cælo, quam à creaturis in terra, honoribus exornari malle, quare missum se omnino faceret, nec in persuadendo frustra laboraret. Contra P. Fride-ricus, gnarus; quantum totius amplissimæ Diæcesis interesset, talem Suffra-

Suffraganeum & Officiale nancisci,
 non ideo urgere destitit. Ex grauiorū
 Doctorum sententia, haud tenere vo-
 tum in talibus circumstantijs: quo-
 rum auctoritati si acquiescere nollet;
 posse & debere in melius commutari:
 in labores scilicet, quos Suffraganei
 Officium in tam amplâ Diœcesi se-
 cum ferret, & plurimos & maximos.
 Non esse proinde, quod conscientia
 suæ metueret; esse verò; si Deo vocā-
 ti resisteret. Hominem tenerrimæ
 conscientia, religione iniecta maxis-
 mē perculsum, mensem circiter deli-
 beratio tenuit. Donec missis ad sin-
 gula cænobia eleemosynis, Deoque
 per homines Deo dicatos consulto,
 vix tandem Theologicis rationibus,
 authoritati directoris propriè consci-
 entia, legitimæ potestati, ac per eam
 Deo haud dubiè; (vt post effectus a-
 bundè monstrauit,) Deum quodam-
 modo propter Deum relinquens, ma-
 nus dedit. Hæc ex Annalibus Con-

gregationis, cuius tunc præfectum agebat. Et verò; solo tum maioris gloriæ Diuinæ studio, id oneris Thomam subiisse; constans postea, eminentiorum etiam & opulentiorum dignitatum neglectus, luculenter docuit. Nam & Episcopatum Chelmensem, & opimam Claræ tumbæ Abbatiam, cum Constantiâ, Regina fauorem & operam suam apud Sigismundum III. magnum virtutis æstimatorem, deferente. nullo negotio obtinere potuisset; adduci non potuit, ut vel vno digito in eam curam incumberet. deniq; rarus honorum, opumq; contemptor, vnice duntaxat beneficio quoad vixit, contentus fuit.

C A P V T VIII.

Patientia.

COgnata humilitati patientia, & Caliarum lapis lydius virtutum, quàm præsto semper fuerit Thomæ; ad omnes iniurias, & incommoda superan-

peranda; editis ab ipso heroicis eius
 exemplis luculentius constabat Agē-
 te adhuc in viuis Thoma, vir primæ
 inter Perillustres Collegas auctorita-
 tis, Erasmus Kretkowski Archidia-
 conus Cracouiensis, insignia complu-
 ra virtutum Thomæ, ac præcipuè hu-
 militatis, ac patientiæ facinora demi-
 rans, ac dilaudans, id quoq; inter alia,
 me audiente retulit Collato pluri-
 bus; in cuiuspiam vici Ecclesia, Con-
 firmationis Sacramento; vasisq; sa-
 cris arcæ, arcâ curru impositis, cur-
 rum iam ascensurus erat, cū super-
 uenit mulier, postulans tingi Sacro
 Chrismate. iussit ille mox arcam cum
 sacro apparatu curru deponi Enim-
 vero famulus id indignè ferens, ar-
 cam, eo impetu ex curru eiecit, vt sa-
 cer apparatus per terram passim spar-
 geretur: tum consenso equo, bom-
 bardaq; exonerata, furibundus abiit.
 Patienti Thomas, tranquilloque ani-
 mo, vecordem famuli proteruiam fe-
 rens

rens, ad colligendum proprijs manibus apparatus, se contulit: nec nisi administrato mulieri Sacramento, viæ sese dedit.

Erat Thomæ ab obsequijs sacris Præbyter, cuius nomini aliàs non ignoto parco. Is animi impotens, moribus asper, verbis mordax, quibus non verborum aculeis, Episcopi heri utiq; sui, exercebat patientiam? Qualis tu mihi, aiebat, Episcopus? nomine tantum non re: titulum habes non vitulum: tum admiratione irrisoria, exagitans cognomen Oborscij à stabulo dictum. atqui pecora, inquit, in stabulis nascuntur. Hæc & huiusmodi alia, spiritu Bricciano, Præbyterum effatientem, excipiens Episcopus spiritu Martiniano, non indignationem prætulit non asperius regellit uerbum: sanctus tanquam non audiens, & non habens in ore suo redargutiones. Sanè pro potestate, qua pollebat herili, potuit tam in
famula-

famulam quam in Præbyterum, con-
 dignis panis, animaduertere, nisi ce-
 dens improbitati, patientiæ maluis-
 set, quàm potentiæ præbere documen-
 ta. Casus: qui non citra famulorum
 culpam cum periculo vel damno Do-
 minorum incidennes, multam alijs
 bilem accendere solent; clementer
 sedatèq; ferebat. Euerterat aliquan-
 do Auriga tanto impetu currum; in
 planâ (ut omnibus videbatur) via; ut
 ex quatuor ferreis fulcris, testudinem
 lecticæ sustinentibus, vnum quidem
 frangeretur, reliqua curuarentur. Iacu-
 latus alius quispiam verborum ful-
 mina, ossifragium aut sauos ictus mi-
 natus fuisset: vel etiam subitam iram,
 in diram acuisset lanceam: at Tho-
 mas, verba duntaxat aliquod lepide
 prolocutus, quibus indignatio Comi-
 tum in aurigam coorta sedaretur; mos
 tibi est, inquit, latum collare ad pal-
 lium requirere, currum autem nescis
 bene regere.

In conuentu Canoniorum, statis diebus cogi folito, qui vulgò Capitulum vocatur, is qui ei tunc præerat, vir cæteroqui laudatus, nescitur ex qua caufa, ira aduerfus Thomam fuprà, futili prætextu vehementius inftiterat, vt ab concilio interim facefferet; ne verbo quidem obnitens paruit Thomas, iamq; ex confefſu abibat: verùm præcipui Collegarum, rei indignitate, cōmoti, modè pariter & cordatè obftitère: ſibi quoq; ſi ille abiret, abeundum cum eo fore, profitentes. Quà erat ſimplicitate, moribusque ad normam ſeculi minimè exactis, patiebatur nonnunquam à nominatis etiam uiris, ſed ſui diſſimilibus, ſcommata & reprehentiones: conſtanti patientia, animiq; æquitate, tolerabat talia; non indignari, non repungere, non expoſtulare cum inferentibus iniuriam, non apud alios conqueri ſilentio deniq; & obliuione omnia tranſmittere, perpetuum

illi fuit. Quæ res eò maioris apud Deum meriti, maiori hominibus admirationi, ac internæ eius perfectionis illustrius exitit argumentum, quò præ dominante bile feruidius Thomæ ingenium natura erogauerat vt non nisi peruigili cura, assiduo luctamine, certaminibus iuxta & victorijs plurimis, ea ipsi, patientis quorumlibet aduersorum euentuum animi, sancta habitudo constiterit.

Quanta verò animi vi, naturali ad iram propensione, ne in offensam Dei erumperet obsistere solitus fuerit, inde perspicitur; quod quoties persentiscebatur ex obiecto quopiam molesto bilem vehementius inardescere, iacebat sese pronus in terram, passisq; manibus ac vultu terræ hærens, corde & ore clamabat: Diligo te Domine, super omnia. Haud sanè cum tali actu, malum culpæ consistere poterat. Sentiebat, non consentiebat: illud erat naturæ, hoc virtutis. quim

ex suborta ad malum propensione ve-
lut gradum sibi faciens, ascendebat
ad sublimissimum dilectionis Dei a-
ctum, omne malum excludentem,
summum bonum promerentem.

C A P V T IX.

Magnanimitas.

CVM præstanti modestia, & humi-
litate inerat Thomæ coniuncta
par animi magnitudo: Sapientissimo
donorum suorum largitore, ac in ex-
colendis, ornandisque animabus sum-
mo artifice Deo. contrarias etiam in
speciem virtutes (neque enim re ipsa
aut sunt aut esse possunt contrariæ, a-
lioqui virtutes non essent:) humili-
tatem, inquam, & magnanimitatem,
ita artificio gratiæ suæ attemperante,
vt neutra seruo suo deellet, & altera
alteri minimè obturbaret. Cætera;
vt supra memoratùm, egregiè humi-
lis, tunc præcipuè celsitatem animi
exerebat, cum de honore DEI, aut
animu-

immunitatibus Ecclesiæ ageretur. Tunc enim uero non personas respiciebat, non vultus potentium reuerbatur. Et quamuis edomitos haberet affectus; neque eòs ultra præscriptos à ratione terminos euagari sineret; nihilominus cùm res poscebat, non secus atq; accipitres aut canes immittebat, in fontes & elatas mentes. Documenta magnanimitatis eius aliqua promo.

Vir quidam genere prænobilis; verùm vnus ex ijs, de quibus psaltes: *non proposuerunt Deum ante conspectum suum, Psal: 53. & non est timor Dei ante oculos eorum: Psal: 13.* is inquam Deum cupiditati suæ postponens, Virginem; studio castitatis, nuptias ipsius declinantem, eaq; de causa arctiore votorum vinculo, obsequio Dei ac Religiosæ vitæ mancipatam; portâ monasterij nitrato puluere eiectâ, sacrilego ausu raptam, incestis nuptiis copulauerat. Vehementer tam e-

norme scelus commouit, cum læcularis, tum præcipuè spiritualis status homines. Quid ille non dixit? quid ex sua parte non egit? ne impunitas sceleris teterrimi exempli, esset alijs illecebra peccandi. Maltatus ille quidem erat grauissimis pænis, Ecclesiasticâ simul & ciuili proscriptione? at cum cognatus eius, potentissimus procerum, honori familiæ consultum volens, non parum pro eo laboraret, & apud Summum Pontificem, ad Ecclesiasticam censuram; & apud Rempubicam, ad infamiam tollendam; Thomas tantum crimen indignum præproperâ indulgentiâ ratus; nequaquam respiciens vultum potentis, magnâ libertate palàm inuehebatur in eum; aduersus quem, propter formidandam omnibus potentiam, vix aliquis etiam magnatum hiscere auderet.

Vt est licentia militaris, absentibus præsertim Ducibus; haud modicis

cis iniurijs & damnis miles in statuis
agens, bona quædam Ecclesiastica
afflixerat. Re cognitâ, ac plurimùm
super pauperes subditos miseresens
Thomas, acres mox, ad Supremum
exercituum Regni Ducem, exaravit
litteras, quibus immunitates violatas,
pauperes oppressos, grauissimè con-
questus, censuras insuper Ecclesiasti-
cas, & vindictam cælestem Duci in-
tentauit. Metuens porro famulo lite-
ras deferenti; ne ab homine vehemē-
tis naturæ aliquid pateretur; iussit,
redditis per alium literis, nullâ ibidē
factâ morâ, reditum maturare. Bene
ea libertas, Ecclesiastico viro digna,
cessit Thomæ. Nam tametsi Dux, le-
ctis literis, non leue commotionis a-
nimi indicium dedisset, requisuisset-
que, quisnam attulisset litteras; vt e-
rat tamen non virtutum minùs, quàm
victoriarum ex hostibus reportatarū,
laude præcellens, tum de insigni San-
ctitate Thomæ vulgâtissima opinio.

ne imbutus, victor & ipse sui, facto ipso perbeneuolè respondit: cum ex bonis Ecclesiasticis militem facessere confestim mandauit.

Ab obitu Episcopi Cracouiensis, administrabat Thomas Episcopatum. Successor Episcopi duntaxat nominatus, vir Primæ in Regno auctoritatis, non acceptâ ab administratore expressa licentiâ, vsurpauerat nonnullam spirituales functionem, quæ ei necdum de iure competeat. Non dubitauit Thomas ex eo percōctari, quânam potestate id fecisset? Respondentes; factum à se in ratihabitione: festiue iuxta ac liberè Thomas, quid si, inquit Diabolus non intelliget, quid sit ratihabitio? Quidam è Clero non postremæ notæ, obuiû fortuitò Thomam salutare ambiebat. Retraxit dexteram Thomas: negans se id ei officij præstare posse, Quoad vinculo excommunicationis teneretur: tum ut quamprimum exsolui curaret; graui-

ter

ter admonuit. Atq; hæc cordata augendi ratio, vt vulgò cunctis nota, animisq; præcepta, citra asperitatis notam, offensamue cuiusquam, perpetua illi in similibus occasionibus fuit.

C. A. P. V. T. X.

Mortificatio.

Quantum ad animi comparandam, augendam, tuendamq; puritatem conferat, seuera in carnem rebellem animaduersio; & exemplis Sanctorum, & verò, magisterio Diuini spiritus, edoctus Thomas, mortificationem Christi, iugiter in corpore suo, castigans illud, & in seruitutem redigens, portauit. Frequens illi cilicij vsus, qui interdum motu corporis, quasi molestum sensum excutere nitentis, alijs ad id magis, quàm ipsomet, aduertentibus, prodebatur: flagellis in se atrociter nonnunquam, prout locus tempusq; sinebat, vrticarum mor-

sibus, sæuiebat. Ea omnia incommoda, quæ longæ peregrinationes secum ferunt, pari & subiit alacritate, & cōstantiā tolerauit. Nam Urbem, Limina Apostolorum visendi, cæteræque pietatis causâ, bis pedes adiit. Egredius Cracouiâ, cum triginta peregrinationis socijs, cum quinque dumtaxat comitibus, Romam attigit: reliquis, siue quòd corporis seu quòd animi impares vires, attulissent, prope rantem assequi non valentibus itaq; intra trimest e spatium, totam peregrinationem obiit: cùm Romæ tres iūtegras hebdomadas, commoratus fuisset.

Lectus illi palâm decenter stratus, ad singularitatis notam euitandam, non ad somnum capessendum: neq; enim in eo vnquam decubuit: sed ordinarium stratum ipsi erat, saccus ex rudi tela, fartus stramine, quem quoties Diæcesim obibat, aliud uè faciebat iter, vacuum circumferrebat. Is in
diuer-

diuersorio, vbi pernoctaturus erat,
 stramine aut fæno implebatur, eratq;
 plumarum loco: quanquam id quoq;
 genus strati, cùm ei molle videretur,
 in scamnum vel humum, lassum re-
 clinabat corpus. In quodam diuerso-
 rio à patrefamilias curiosiùs per fora-
 men ostij, quid Thomas ageret inspi-
 ciente, obseruatus est, posthabitâ le-
 cti commoditate, in terram se tenui-
 duntaxat tapete instratam, abiecit.
 Mensa pro conditione accumbentium
 non illiberalis; intra tamen limites
 modestiæ, nec solùm ipse studebat
 temperantiæ, verùm etiam cauebat
 studiosè, ne conuiuis quos tractabat,
 excedendi in potu præberet ansam.
 Itaq; quoties caritatis mutuæ conci-
 liandæ, augendæq; gratiâ; excipie-
 bat mensâ Perillutres Collegas; sup-
 peditabat vinum præstans pro digni-
 tate personarum. in certâ tamen lin-
 gulis mensurâ, quæ & excessum arce-
 ret, & corpori, animoq; recreando
 satis.

44.
fatis esset. Quod & ipse gratiose faci-
ebat, & conuiuæ accipiebant iucun-
dè, festiuis interim iocis ludentes, in
eam adameriendi vini sollicitudinem.
Ludos, quibus alij nonnihil ori, sal-
uis decori legibus, impendunt ani-
morum à curis laxandorum; fallen-
di temporis gratiâ; nec ipse vsurpa-
bat: nec ab alijs, vbi periculum ades-
set Diuinæ offensæ, vsurpari Domi-
lux sinebat.

C A P V XI.

Castitas.

Nemo erat, qui in materiâ castita-
tis. sinistri quidquam de Thoma
proloqui auderet: Præcellente san-
ctitatis opinione, tenues etiam suspi-
ciones depellente: quam opinionem
factis asserebat. Solus in conclauis in-
teriore capiebat quietem; nemine eti-
am epheborum, qui ad obsequia præ-
sto esset, admissio. Inuitatus à Ma-
gnate quodam ad conuiuium, postea-
quam

quam aduertit; matronam quandam
 melioris formæ quàm famæ, eidem
 mensæ accubuisse, negauit ad eam
 locum sibi esse. Retinente comiter
 Magnate, conuiuis ad latus sitis, e-
 gressum negantibus, per calcatam
 mensam ab dedecoro sese eripuit con-
 fessu. Erat Thomæ perpetis martyrii
 instar, morbi genus quoddam: medici
 (Dysuriâ) appellant. Hæc verò in po-
 strema ægritudine, ita inualuerat, vt
 ad suprema eum deduxerit. Varijs
 tentatis remedijs, nec quidquam pro-
 ficientibus, obtulerat operam suam
 non nemo chyrurgorum, spondens,
 se beneficio certi instrumenti amotis
 obicibus, vijsque laxatis, prægrauè
 retento humore, naturam leuaturum.
 rametsi licitum remedij genus, erat
 tamen arduum, nec satis certum, &
 pudibundo homini valde contrariū.
 Quid plura? præoptauit Thomas po-
 tius mori. quam vim verecundiæ suæ
 incerto euentu inferri.

DE his utique compendio (quis enim omnes recenscat?) in præfentiarum loquimur: quos cultu Divino promouendo, salute plurimarum animarum procuranda, triginta præfertim annorum, quibus munere Episcopi functus est, curriculo exantlavit. Itaque citra exaggerationem audent dicere paucos admodum nunc cultores vineæ Christi reperiri; quicum Thoma, magnitudine, assiduitate, tolerantia laborum, ex æquo certare possint. Porro, ad capeßendos labores, etsi præcipuè maior Dei gloria, salus proximorum, ratio officij animi eius incitabant, non minimùm tamen calcar addebat, memoria voti quondam emissi de non admittenda vlla dignitate Ecclesiastica. quod quia commutatum sibi reputabat in laboriosas Suffraganei functiones, religionem se teneri arbitrabatur ad eas quam

exactissimè obeundas. Præcipuorum
 laborum numerosam seriem; in Dia-
 rio eius adnotatam, ac Epitaphio,
 quod in Basilica Cathedrali extat,
 summatim insertam, lectori de verbo
 ad verbum excerptam, appono. Or-
 dinationes sacras fecit CLVIII: qui-
 bus Præbyteros creavit. MMCLX-
 XXV. sacrauit Ecclesias CXLIII. Al-
 taria fixa DCCV. Altaria portatilia
 M. Calices MDCGLVII. Consecrauit
 Episcopos VI qui nouit quàm ope-
 ra sunt huiusmodi functiones, non
 negabit utique Thomam seruiuisse
 Christo, vsque ad defatigationem.
 Neque solum in virili ætate, sed eti-
 am prouecta, atq; ad extremam ver-
 gente, strenuè & mira alacritate, di-
 cta munia exequabatur. Neq; hæc
 solum officij sui propria, sed etiam ad
 alia Antecessoribus suis insueta, spiri-
 tu actus Apostolico, sese extendebat.
 Eluxit id potissimum in Apostolicis
 totius Diœceleos peregrinationibus:

quas

quas quo zelo, diligentia, lucrorum
spiritualium siti pariter & prouentu
obierit; sequenti capite explicatiùs
proferam.

C A P V T XIII.

Zelus animarum.

IS enim uerò, cùm aliàs in totâ vitâ;
tùm præcipuè enituit, in lustratio-
nibus Diœceseos (ueriùs missiones
Apostolicas dixerim) quibus vix
quidquàm in tota eius vita illustrius
exitit. Fuerunt illæ, planè spectatifi-
simum virtutum eius theatrum: offi-
cina meritorum: campus bene de pro-
ximis merendi amplissimus: quò
Thomas, totis laxatis caritatis habe-
nis, in salutem plurimarum anima-
rum irrequieus ferebatur. Quòd ne-
mo ante factitauit; obibat Diœce-
sim: ampliùs quàm mille parochias
complectentem: id quod faciebat,
bis singulis annis: tres integros men-
ses, vnicuique impendens missioni.

Porto,

Porro, talium missionū, hæc ratio, & ordo subsidia fuere. Ducebat secum semper, quatuor Præsbyteros: duos e Societate I E S V: quorum functio perpetua erat, pænitentibus aures dare, concionari: rudes, fidei & morum, doctrinā, tum in Ecclesijs publicè, tum in domibus priuatim imbuere; nodos conscientiae resolvere; discordes in mutuam gratiam reponere: dissidentes in religione Orthodoxæ Ecclesiæ restituere. Duo alij, domestici eius erant: vulgo Capellani dicti; quos morum integritate & doctrinā, cæterisque talentis per idoneos, ad similes deligebat functiones: & obligatos esse; adiectā hâcce disertè, cū eos ad obsequia reciperet, conditione; volebar. Hi quatuor erant, Apostolicarum eius peregrinationum perpetui comites: ordinarij laborum socij: & in visitatione parochiarum, velut auxiliaria manus: ad suppetias Carionibus ferendas, ordinata. Cæ-

terum præter hanc ordinariam mæ-
 num; alij quoque ex vicinis pagis &
 oppidis Sacerdotes, famâ aduentus
 Thomæ, velut classico exciti, ad præ-
 stitutum visitationis (quæ erat instar
 magnæ celebritatis) tempus, frequen-
 tes adesse solebant: quò, in partem
 laboris venirent: in confessionibus
 populi concurrentis maximè excipi-
 endis: vt suo loco referam. Duabus
 ante septimanis, quàm vnāquamq;
 adiret Ecclesiam; præmittebat per fa-
 mulum patentes literas: quibus pu-
 blicè in Ecclesia ex suggestu lectis, in-
 uitabatur populus ad percipiendum
 Sacramentum Confirmationis: præ-
 uiamq; exomologesim. Monebantur
 præterea Dynastæ locorum: quò sub-
 ditis pro eo tempore immunitatem à
 consuetis laboribus cōcederent: quod
 quidem illi perlibenter faciebant; ne-
 que solùm Catholici, sed (quæ erat
 opinio Sanctitatis de Thoma) etiam
 Hæretici. Quare ad stuporem nume-
 rossimus

rosissimus confluebat populus : Parochis ipsis admirantibus, tantam frequentiam; quantam aliàs in sollemnissimis etiam festis cernere, haud sibi contigisset, non solum Ecclesiam, sed & cæmeterium confertim implebāt. Conspectu tantæ multitudinis, plurimum delectatus Thomas, continere oculos non potuit; quin internum gestientis animi gaudium, prorumpentibus lacrymis testaretur.

Per eundem famulum, præmittebat pecuniam, suæ & suorum sustentationi necessariam; maiorem vel minorem; pro numero dierum; quibus in rem cuiusq; Ecclesiæ commorari eum necesse erat: quippe nolebat Parochos ullo grauari sumptu, & si qui opulentiores renuebant accipere, ferebat ægrè; ac solito iam tristior affidebat mensæ: denique in discessu clam suppositam relinquebat Curioni pecuniam.

Vt primùm quampiam Ecclesiam

Da

adijs

adiit; nullâ interpositâ morâ, solita munia aggrediebatur: atq; inprimis Sacramenti Confirmationis administrationem: cui præludebat semper, accommodato ad præiens negotium sermone, de naturâ, dignitate, effectibus Sacramenti id quod vel ipsemet faciebat; simplici quodam, naturali, ingenuo, citraq; affectatæ orationis fucos modo: vel per aliquem è duobus; quos secum ducebat, Societatis Præsbyterum. Intento Episcopalibus functionibus Thoma; familiares interim eius, tum alij, tum qui ex vicinioribus Parochijs ad constitutam Visitationis diem frequentes aderant Præsbyteri, per exedras, in templo & cæmeterio dispositas, distributi; toti erant in audiendis Confessionibus pœnitentium: quorum tantus erat numerus, ut à summo mane (vix datâ sub meridiem reficiendo corpori aliqua quiete) ad mediam noctem, non rarò producerentur. Attendebat ipse,

ipse, ne quispiam ab excipiendis confessionibus distraheretur: ideòque ipsemet administrabat Eucharistiam: quanquam cum per alias occupationes liceret; dabat & ipse aures confidentibus. Laborem vix tolerabilem, non parum expeditiorem, reddebat, prauia diligens, Cathechistica institutio: ita vt pœnitentes ad Confessarios non accederent, nisi prius in mysterijs fidei Christianæ, præceptis Dei, modoq; ritè confitendi, ac communicandi instructi.

Iam verò Sacramentum Confirmationis, quò expeditiùs administraret, curabat confirmandos in duos distribui ordines: quam longa erat Ecclesia, protensos: inter quos medius incedens; ac ad singulos accedens; cōferebat Sacramentum: Sellâ Episcopali interim vacante. adeò oblitus propriæ tum commoditatis, tum dignitatis; non nisi populi vsibus seruebat.

D 3 Deniq;

Deniq; libet hîc adtexere, quæ de
 magnitudine zeli Thomæ, oculatus
 gestorum eius testis, Pater Valenti-
 nus Sophronius, hisce perscripsit ad
 me verbis: Tolerabat Antistes Lao-
 dieæ opprobria: rerum defectû: cæli
 iniurias: animabus Deo reconcilian-
 dis intentus. calcabat fimeta: tuguria
 squallida ingrediebatur: vt interro-
 ganti quidnam illic ageret; respon-
 dere potuerit; gemmas ex stercore
 colligo: animas, inquam, pauperum,
 miserorum hominum, pro quibus
 mercator non insipiens, ipsa vtique
 Sapientia, Filius Dei, pretiosissimum
 Sanguinem, vitamque ipsam impen-
 dit. Hinc fortasse proficiscebâtur illa
 oscula, terræ; seu in campis seu in
 templis, frequenter ab eo infixâ: qui-
 bus (vt credere fas est) Deum adoran-
 do; vel eustodes hominum Angelos
 salutando: eorum simul opem postu-
 labat: vt se suosque cooperatores, in
 animabus Christo Domino lucrâdis,
 adiuvâ-

adiuvarent. Eundē zelum testabantur lacrymæ: quæ erūpebant ex oculis eius, tam in itineribus quam in colloquijs ad mensam; cū aliquid notabile de lucris animarum per exomologesim factis narraretur. Ex hoc zelo, & amore erga animas, tantum illi inerat studium conuertendi ad Deum proximos; vt cū necessitas postularet, ipsemet confessiones vulgi exciperet, & propter instructionem rudium, libellos secum circumferret: ac denique, singulis diebus, à meridie ad populū verba faceret, de Sacramento cōfirmationis & pænītentiæ: tantā cōstantiā, vt si quando plures non adessent præsertim cū iam è loco ad locum seu ad Ecclesiam aliam transendum erat, tribus etiam hominibus doctrinam salutiferā instillaret. Hæc his ipsis verbis P. Sophronius. Ex quibus alijsqu: supra allatis, plura eiusdem generis colligere licet: quæ hīc brevitatis studio omittuntur.

C A P V T XIV.

*Misericordia & liberalitas in
pauperes.*

SVper miseros, pio miserationis
affectu, intimè commouebatur.
Eum verò non verbis solùm, sed &
lacrymis, demum re ipsa, submistran-
dis scilicet leuandæ miseriæ subsidijs.
testatissimum reddebat. Quoties è
domo prodibat, stipem manu sua
largiebatur, & sequebantur, & oc-
currebant eunti: certi se Eleemosynâ
non frustrandos. Cùm alios Ordines
Mendicantes, tum Societatem I E S V,
cuius obsequijs ad suum profectum
& aliorum salutem promouendam v-
tebatur; peculiari beneficiâ prose-
quebatur. In Domum Professam vti
ex instituto mendicam; absq; vllò
bonorum immobilium, censuumuè
subsidio, ex meritis viuente eleemo-
synis; impensior eius liberalitas ex-
titit. Cùm alijs temporibus, tum
præcipuè pro festis solennioribus, mo-
dò pe.

do pecuniam vñibus templi vel domus necessariam, occultè quidem, quoad poterat, tribuebat: modò villanæ munera gazæ, grandes frumenti aceruos, ac copiosum alitum domesticorum numerum, inferri in domum, curabat. Hoc verò, beneficentiam eius faciebat gratiosissimam: quòd non expectabat, vt ab eo leuamenta inopix peterentur; sed vtrò, non rogatus tribuebat: præueniens etiam necessitates: ac per hoc modestiæ pudoriqu; consulens eorum, quos quantum egestas impellebat ad petendum, tantum, vel ampliùs, verecundia retrahabat. Occupatus aliquando lustrandâ pro more Diæcesi, consuetas, solito tempore non dederat domui Professæ eleemosynas: tarditatem redux compensauit abundè liberalitate: missis, per vnum è nostris laborum Socijs quadringentis florenis.

Inerat Thomæ perrara mortalibus virtus, pecuniæ contemptus. Quæ est

amplitudo Diæceseos Cracouiensis;
 & incolarum frequentia, statis ordi-
 nationum temporibus, magno ordi-
 nandi numero confluebant; quorum
 vnumquemque necesse erat testimo-
 nium suscepti ordinis (literas forma-
 tas vocant) accipere, atq; pro more
 vsitato obtinendis illis aliquid pecu-
 niæ impendere. Intuens aliquando
 Thomas Grandiusculum huiusmodi
 literarum cumulum, præsentem tum P.
 Sophronio: Certè, inquit, Pater Va-
 lentine, non contemnenda hinc colli-
 geretur pecunia. Erat nempe quod
 cuiusquam alterius humanam haben-
 di pelliceret cupiditatem: nec deerat
 rationabilis prætextus, eò quod hu-
 iusmodi literæ non sine aliquo sum-
 ptu & labore constarent, Nihil vn-
 quam accipiebat, aut à suis accipi si-
 nebat Thomas. quo loco suavi re-
 cordatione recurrit memoriæ prudēs
 dictum Sancti Edmundi Archiepi-
 scopi Cantuariensis. Nullas hic S.
 Anti

Antistes destinauerat accipere à Sacerdotibus multas pecuniarias. Opponentibus amicis, Sanctum Elfegum antecessorem eius solitum accipere huiusmodi multas, respondit Credite mihi non propterea Sanctus fuit. Sunt quædam sanè, quæ haud illicitè fiunt, sed laudabilius non fiunt. Elfegus accipiendo non incurrebat noxam. Edmundus insuper merebatur gratiam: ille non destruebat; hic ædificabat: ille aberat ab auaritiæ crimine; hic etiam à suspicione: in illo non erat quod reprehenderent boni; in isto ne quidem quod cåperent mali. Æmulamini o Prælati exempla potiora.

Thomas non solum consuetas non accipiebat obuentiones, sed & insuetas faciebat largitiones. Notum fidelibus, quanto ceremoniarum ambitu; quantâ Cleri frequentiam pridie Parasceues Episcopi conficiunt Sacrum oleum. Thomas quo celebrior actus
rede.

redderetur, neminem sacerdotum dimittebat, quin vnicuique 12. grossos numerari iuberet. Itaq; ex alijs etiam Ecclesijs promptè conueniebant ad pium & vtile obsequium.

Enituit is idem pecuniæ contemptus in occurrentibus piorum operũ occasionibus. Debebat ei Collegium S. Petri, aliquot centena florenorum. cùm iam tempus reddendi appeteret; conueniens eum P. Procurator Collegij, Pater Lucas Gladissius; fate-mur, ait, nos debere: atqui reddere non possumus, nisi veteri moneta: quænam, (ait ille) hæc moneta? respondit Pater: Deo gratias Reuerendissime tum nihil moratus Thomas; Bona, inquit, est moneta; eam proinde accepto libens. Misto admirationi gaudio, ex tam subito, tamq; liberali responso gestiens Pater, pari admiratione & lætitia, Domum inopiâ pressam compleuit. Eodem Christianæ miserationis affectu, duo millia
flore-

florenorum pauperibus subditis remi-
 sit Neq; solùm in præsens, piam,
 prolixè exercuit liberalitatem: verũ
 etiam in secula postera transmisit:
 quippe experientiã doctus, quantum
 ex lustratione Diæcesis, quotannis, vt
 supra dixi, à se fieri solitã, spirituali-
 um lucrorum in vniuersam Diæce-
 sim, promanaret; quamq, innumeris
 ea functio Apostolica, Spiritualibus,
 præsertim misericordiæ redundaret
 operibus; quòd hoc tantum bonum,
 perpetuum esset; neue successores e-
 ius, aut inopiã ab Diæcesi obeundã
 præpedirentur; aut Parochos grau-
 rent; viginti millium summam, in
 perpetuum locauit censum: quo scili-
 cet annuè percepto, & ipsimet in di-
 ctis lustrationibus commodè susten-
 tarentur, & ad lustrandum obligatos
 se esse intelligerent.

Id verò in Thoma mirandum vi-
 detur, quĩ in tali mediocritate redi-
 tum, vt pote vnico beneficio, eoq;
 non

non prædiuite contentus, non solum contuetis, vel per occasionem incidentibus, velut inexhaustâ pietate tribuendis eleemosynis; sed etiam stabilibus fundandis, par esse potuerit. Atqui huius rei non vna causa assignari potest. Prima & potissima; benedictio Dei; *potentis*, ut Apostolus ait, *omnem gratiam abundare facere in nobis, ut in omnibus semper omnem sufficientiam habentes, abundemus in omne opus bonum, sicut scriptum est: dispersit dedit pauperibus, iustitia eius manet in seculum seculi.* Neq; enim, aut verax mentitus est; cum dixit; *Date & dabitur vobis:* aut benignissima illa, ac beneficentissima natura, perennis omnis coptæ fons, patitur se liberalitate nostrâ vinci: quin potius quidquid pauperibus datur, sibi datum reputans, multiplicato fœnore redhibet, attestante per Salomonem Spiritu Sancto: *generatur Domino, qui miseretur pauperum.* Hac solâ, licitâ, piâ, sanctâq; vñrâ;

vsurâ; hoc laudabili sznore, velut
 quætaosissimâ vîus arte, abundabat
 Thomas, in omne opus bonum. Ve-
 rùm quia prudens illud sapientis E-
 thnici pronunciatum; cum Deo ma-
 num moue; non apud Ethnicos so-
 lùm, sed etiam apud Christianos, ve-
 ritatis locum tenet; aderat Thomæ,
 in subsidium melioris fortunæ, cùm
 diligentia, tum industria, in tractan-
 da re æconomica; ita quidem; vt non
 vsui ipsius, vnioniq; cum Deo, non
 tranquillitati animi obturbarent.
 quod sanè, seruis Dei, aspirante gra-
 tia eiusdem, haud ita difficile præsti-
 tu est: dum omnia per diem agitan-
 da, partim generali pro tota die, par-
 tim specialibus ad singulas actiones
 adhibitis propositis, ad maiorem Dei
 referunt gloriam: atq; in medio eti-
 am occupationum, denso agmine in-
 currentium, tumultu, in minimis pa-
 riter & maximis negotijs. ad eum per
 orationem recurrunt: sine quo nec
 maxi-

maxima subsistunt: adeo ut ipsa tractatio temporalium, sit ipsis materia agendi cum Deo. Quod vel maxime propter eos dictum velim: qui inopia spiritus, curam rerum temporalium obtendentes, negant se, mole terrenarum occupationum obstante, in Deum & caelestia, oculos mentis intendere posse. Quod secus se habere; frequens experientia, & Sanctorum exempla, docent. Nam priscis Eremiticis, solenne fuisse legimus: manuali labori iungere orationem: & manibus quidem laborabant, corde autem, quae spiritus erant, voluebant. Quid tam occupat, & ab alijs cogitationibus auocat animum, quam cruentum negotium, pugna scilicet confligentium in bello; ubi spes, metus, cupiditas ira, raptant in diuersa praedantium animos? Et tamen, de acerrimo bellatore Iuda Machabeo, & pugnacissimis eius militibus, disertè testatur Scriptura; quod in seruire con-

Conflictus, mentes ad Deum eleuatas
 habuerint: *manu quidem, ait, pugnantes
 sed Dominum cordibus inuocantes.* Haud
 præterierim hic, admirabile illud or-
 ganum Spiritus Sancti, Magistrum
 virtutum omnium merito appellatū,
 Thomam de Kempis: cuius mihi vi-
 tam legenti, non semel incidit illa co-
 gitatio, quonam pacto officium Pro-
 curatoris seu Præfecti œconomix to-
 tius monasterij; utique munus, ut
 temporalium curarum plenum, ita di-
 stractionum feracissimum, vel sulci-
 pere voluerit: vel potuerit sustinere
 vir, cæteroqui Deo plenus, ac tantæ
 vnionis vsusq; cum eo; quantum lucu-
 lentissimè indicant, cum alia non
 pauca spiritali eruditione grauida
 volumina, tum præcipuè illud nun-
 quam laudatum satis, quod titulo; De
 Imitatione Christi, prænotatur.
 Cuius quidem libri; mole modici,
 virtute maximi, dum vim, efficaciam,
 utilitates cogitatione persequor, fi-
 nem

nem mihi æstimandi eius, laudandiq;
 inuenire non videor. Est, meritò di-
 xerim, spiritus Christi medulla: cæ-
 lestium sensuum armarium: armorum
 spiritualium promptuarium: calcar
 virtutis: fomentum sanctitatis: pro-
 uectio perfectionis: suauis, animæ esu-
 rientis iustitiam, pabulum: afflictæ so-
 latium: quies turbata: perfugium
 tentata: labentis fulcrum: anchora
 fluctuantis: fida statio periclitantis:
 deniq; felicissimum, ac tale (quod sci-
 am) sub sole vnicum, Euangelicæ, cæ-
 lestis Magistri IESU Christi, doctri-
 næ, compendium. Verùm dum hæc
 impetu quodam calentis animi fun-
 do; sentio me sensim delabi ad ea;
 quæ metas propositæ materiæ exce-
 dere videri possint. Igitur ad Tho-
 mam Oborski redeamus. Inde enim
 sumpta digrediendi occasio, quòd
 Thomas Oborski, quòd pijs largitio-
 nibus sufficeret: haud ignauam rei œ-
 conomicæ nauabat operam; citra qui-
 dem

dem detrimentum spiritûs : vti cùm alij plurimi vitæ Sanctimonia conspicui, tum deditissimus alioqui rerum diuinarum contemplationi, Thomas de Kempis: ad quem vbi ventum est, ac ad diuinum eius de Imitatione Christi partum, mox cum auctoris, tum operis Sanctitas, in meritiſſimas ſui laudes haud inuitum calamum rapuêre. Cæterùm, vti edicere cæperamus, altera poſt benedictionem diuinam, cur Thomas Oborski in miſericordiæ opera abundaret, cauſa fuit; ſcita & ſeria rei œconomiæ adminiſtratio: neq; ſolùm bonorum proprij beneficij; ſed etiam de alijs conductorũ. Quippe polygamiã ſpiritualem, velut ſcopulum vitæ Eccleſiaſticae, multorum naufragijs infamem, ſtudioſè deuittans; quò tamen, & muneris ſui dignitatem ex decoro tueri, & piam in pauperes liberalitatem, prolixius exercere poſſet; malebat conducendis, etiam.

mercede, ac labore excolendis, alienis agris, alijsque operosis industrijs, rem familiarem, inoffensâ conscientiâ, augere; quàm contra Diuina & humana iura, adeoq; certo salutis periculo, pluribus beneficijs citra necessitatem, vel maiorem vtilitatem Ecclesiæ, incubare. Deniq; parsimonia, erat Thomæ, grandis instar vectigalis. Sumptuosorum oblectationum illicitarum, vsus penitus nullus: vix aliquis; nec nisi honestissimus, licitarum, non famulitium superfluum: non cultus corporis sui, ac suorum nimius: omnia intra decorum status, pretij modesti: necessitatis, honestatisq; modo dimensa omnia.

Memoratis supra misericordiæ erga viuos operibus; libet adtexere opus misericordiæ erga mortuum, tantò illustrius, quod & vili personæ impensum, & non citra periculum vitæ. Agebat tum in villa Thomas, cùm vnum ex inferioris notæ famulis, lues
pesti.

pestifera extinxit. Porro metu letiferi contagij, cunctos deterrente, nemo erat familiarium, nemo villanorum, qui operam suam ad sepeliendum offerret. Itaq; ipsemet Thomas, operi quantumvis periculoso, quia pium erat, manus proprias admouet. Tum verò puduit seruos non sequi: quando herus tam animosè præiret. Exemplum incussit pudorem; pudor addidit animos; vt quot alioqui non fecissent; supremum obsequium conseruo præstarent, ac pij laboris socij facti, in meriti quoq; venirent societatem.

C A P V T XV.

Iustitia.

EX supra narratis, pronum est intelligere, quàm exactus fuerit Thomas, in suo vnicuiq; reddendo iure. Sanè qui tam prolixè largiebatur propria, qui potuit vsurpare aliena? quomodo rem alterius, maioris

E 2 mo.

momenti, sciens retinuisset, qui acum etiam, in diuersorio commodato acceptam, postquam longum confecisset iter; Domino, vt Capite *6.* memoratum, remisit? Itaq; mercedem operarijs, stipendium famulis, mutuò sumpta, Dominis, condicte tempore ex integro reddebat.

Ex villa, cuius, tum possessor erat Thomas, longo temporis tractu, non nisi quadraginta florenos, Antecessores certæ communitati loco decimæ pendebant. Postulante illâ auctiōc, seu quòd antiquitùs plùs dabatur, seu quòd auctis processu temporis annu- is fundorum fructibus, conueniens erat augeri pretium decimæ; non cō- trariam conuetudinem, non aliud causæ opposuit Thomas: solius æqui- tatis habitâ ratione, sancit, vt non quadraginta deinceps, sed quadrin- genti penderentur.

Pro tempore, quo lustrabat Dice- cesim (quod quotannis æstiuis mēsi- bus,

bus, magno, vt suo loco reddidi Di-
 ceceseos emolumento, faciebat:) sal-
 uæ illi ex meritissimo Venerabilis
 Collegij consensu, manebant obuen-
 tiones, quas Canonici, non nisi præ-
 sentes, hebdomadatim percipere so-
 lent. Lustratione quadam perfectâ,
 cùm rediret, persuaferunt Thomæ co-
 mites; vt in villa propriâ, post tot
 labores, suæ suorumq; quieti, aliquot
 dies daret. Commoratus est ferè bi-
 duum Reduci obtulit Notarius Ca-
 pituli, totum illud; quod deberi ipsi,
 à die egressus ex Ciuitate Cracouien-
 si, ad diem regressus, ad eandem com-
 putabat. Negauit Thomas, perceptu-
 rum se quidquam pro illis diebus, qui-
 bus hæuisset in villa: vt pote quos
 priuatæ quieti, non publicæ Diæce-
 seos vtilitati, impendisset;

Munerum constans aspernator e-
 rat: nec solùm eorum, quæ humanos
 animos ab recto & æquo in transuer-
 sum agunt, atque ex iudicibus reos

faciunt; sed quæ etiam honesto titulo conuerti, dantemq; , iuxta, atque accipientem à culpa excusare possunt. Cùm coniecrandis Ecclesijs, alijsque laboriosis officij sui functionibus daret operam, non rarò ei varia à varijs, & à Magnatibus magnifica dona, grati animi testificandi causa, offerebantur. Ea verò, nec acceperat ipse, nec à suorum quopiam accipi, permittebat. Magnatum quidam, in cuius bonis, Thomas templum solenni actu dedicauerat, dedecori sibi ducens; si indonatum Thomam dimitteret, non parum laborauit, vt ab se, nobile donum acciperet. Cùm nihil profecisset; vt tamen animi sui cellitati, vtcunque faceret satis; comiti eius Præsbytero ingessit quindecim imperiales. Adeo Thomas ægrè tulit, non repudiatum munus à Præsbytero; vt præter acres, (Giezy & Simonis exemplis adductis) increpationes; professus sit, ne mentæ quidem eidem.

cum

73.
cum ipso assidere velle. Confusus,
multumq; turbatus, pœnitens mul-
tùm Præsbyter, coactus est recurrere
ad Confessarium Thomæ P. Frideri-
cum Szembek: cuius demum gratiæ,
ac auctoritatis interuentu, ægrè qui-
dem, in pristinæ gratiæ gradum est re-
stitutus. Atq; hoc ita fuisse, ipsomet
Præsbytero referente, intellexi.

C A P V T XVI.

Infirmi prodigiosè curati.

Plâ quâdam persuasione ductus;
non facilè remedium efficacius ad
depellendos morbos inueniri puta-
bat; quàm quod supremus animarû,
& corporum medicus Saluator ipse
insinuasse, ac velut ex obliquo probas-
se; commendasseq; videtur: dum eo,
vsum Samaritanum, in eo, qui inci-
derat in latrones curando, refert. Ita-
que vlitatissimum Thomæ fuit, vino
& oleo commistis, & ad ignem mo-
dicè calefactis, mederi ægris. Et quâ-

Es quam

quam id genus remediij, si indolem eius spectes; non cuilibet indiscriminatim morbo curando idoneum sit; fiebat tamen; ut quod natura medicinæ negauerat, fides medentis suppleret. Plurimum huiusmodi curationum; vnicum exhibeo specimen, à P. Valentino Sophronio Societ. Sacerdote, trienni Apostolicorum Thomæ laborum socio; inter plura eiusdem gesta, mihi perscriptum. In vico, Mons S. Ioannis nuncupato, auriga, Gregorius nomine; vehementi caput æstuarie febris, inde incessit Comites, non metus solum, ne ulterius progredi non possent, sed planè desperatio. Obiectum prosequendæ viæ impedimentum, deterunt ad Thomam: tum ille, ad usurpatum toties, prospero euentu, remedium recurrit: vinum ipsemet cum oleo miscet; opponente quodam ex Religiosis Sacerdotibus, tali remedio ignem igni addendum, ac febris ardentissimæ fomitem.

mini-

ministrandum; atqui (reponit Thomas,) Christi est hæc medicina: tum poculum infirmo mittit: intrepidè sumere iubet: sumpsit, conualuit, eodemq; mox die, herum & medicum suum, alacer vexit.

Nobilem quendam, septennium iam, morbus lecto detinuerat. Is quo die suprema officia, Thomæ, exsoluebantur, quæsiuit: quorsum Sigismundus pulsaretur; (Campana est, ad Basilicam Cathedralem eo vocabulo indigetata, quod Sigismundi Primi Regis tempore, & impensis, steterit: opus ob raram magnitudinem, formæ elegantiam, præstantiam materiæ, sonique suauitatem, Regio nomine, & magnificentia dignum:) vbi igitur responsum tulit; pulsari Suffraganeos; Sanctus, inquit, homo is est, quid ego moror? vadam ad ipsum, utcumq; poterò. Trepido, nutanteque incedens gressu, ut primum gradus Basilicæ attingit, integram sanitatem recepit.

Qui-

Quidam item, ad Corpus Thomæ infirmo sibi restitutam valetudinem, cum esset adhuc adolescens; postea factus Sacerdos iureiurando affirmavit. Ferunt & mulierem oculis captam, visum ibidem recepisse.

Non minus fuit prodigiosa curatio, quam post priorem libri editionem ex viro fide dignissimo comperi, eò quidem maiore meâ voluptate, quod interuentu libelli vt instrumenti assumpti, illam fieri Diuinæ bonitati placuerit.

Sub tempus Coronationis Serenissimi Michaelis Primi, Poloniæ Regis, conuenit me Perillustris M. Dominus Martinus Oborski, Gubernator Liuentis, vir cum genere sibi cum Thoma communi, tum naturæ dotibus, & officijs in Republica gestis nobilissimus. Ipse quippe in duobus Generalibus totius Regni Conuentibus Vniuersæ Nobilitatis Directorem (Marchalcum vulgo vocant) præclare egit,

egit, & vero quis aliud præstantius,
 de eius prudentia, dexteritate, studio
 boni publici, integritate, fide, iudici-
 um desideret, quàm quòd in luce &
 theatro totius Reipublicæ tulit? Is
 igitur illato sermone, de Thoma Pa-
 truo, eiusq; virtutum & admirando-
 rum operum impressa narratione, nar-
 ravit ipse, singularem gratiam inter-
 cessione, obtentam. Rogatus à me ut
 rem prout gesta est scripto consigna-
 ret, nihil moratus, ut est literis appri-
 mè excultus, pari latini eloquij ele-
 gantia, ac facultate, sequentia in
 chartam effudit. Anno Domini 1664-
 feria tertia ante Dominicam Palma-
 rum, renuntiatū nobis erat (puta Pa-
 rentibus) trans fluuium Bugum tunc
 commorantibus, filiam nostram vni-
 cè caram, nomine Mariam Eleono-
 ram morbo varijs Symptomatibus
 prægravi maximè laborare. Morbi
 genus vernaculo vocabulo Odra di-
 ctum, erat ex eo capite valde pericu-
 losum;

losum; quia papillæ rubentes intro-
sum versæ erant, quod mali mortife-
ri indicium certum esse solet. Quod
vbi nobis innotuit, Pater afflictissim⁹,
concito equestri cursu, quindecim
milliaribus, quantumvis breui tunc
die, confectis, deliquio collapsam re-
perit, desperatâ salute, in proprium
conclauē secedit. Vbi Deo ita dispo-
nente coniicit oculos in literas Per-
illōstris ac Reuerendissimi Domini
Iudicki, M. Ducatus Lithuaniae Inpre-
mi Notarij, vnaq; in donarium, aui-
de præoptatum, ab eodem missum,
Historiam vitæ exemplaris Thomæ
Oborski Suffraganei Cracouiensis,
quo libro cum amplexu excepto in
Cameram agræ, ac pene animam a-
gentis pergit; librum dorso subster-
nit, conceptis expressè verbis: vt tuus
te Auus, misera nata, ad vitam redu-
cat. Libri suppositionem mox sub-
secutus est somnus sed breuis. Intra
horam, nuntiatus est parenti, euigilaf.
se fi.

se filiolum; confestim accurrit; sanam ex integro reperit, papulæ quas introrsum versas supra retuli, in superficiem rursus euasere, ea parte corpusculi & tanto planè spatio, quantum liber substratus occupauerat, ut dubitare non licuerit, extraordinaria cælesti vi, malignitatem morbi vna cum papulis per contactum libri extractam, ad suffragationem eius, cuius vitam liber continebat. Hactenus miraculosa filiolæ curatio, quam prout à parente viro laudatissimo conscripta est, inserendam hîc putavi, quo dignitas scribentis, certiolem faceret fidem scriptis.

Præsto memoriæ est aliud quoddam beneficiû suffragantibus Thomæ meritis obtentum, quod ea mihi certitudine cognitum est, quæ maior humanitus haberi non potest. Anno Domini 1668. 12. Febr. quendam Professione Religiosum, ordine Sacerdotum, ætate septuaginta duorum an-

norum senem, tam vehemens repen-
 te arripuit calculus, vt suprema breui
 deducturus eum putaretur, tenuit
 porro ipsum modò acriori, per inter-
 ualla recurrens, nouem circiter men-
 ses. Tandem 12. Nouembris cum
 supra modum inualuisset, venit affli-
 cto agro in mentem, Thomam quoq;
 simili morbo laborasse; non ignarum
 proinde mali, misero succursurum.
 Erat in promptu, Cingulum Thomæ,
 quod ager, sacri instar pignoris, apud
 se seruabat. Eo igitur, præmissa bre-
 ui oratione, sese circumcingit, mox-
 que cruciatus cessauit, vnum & alte-
 rum diem, tertiâ vero die, repente,
 mira facilitate, citra vllum doloris
 sensum, quem minuscule etiam infer-
 re solent, grandi calculo leuatus, in-
 tegram sanitatem recepit. Atq; par-
 iterum, post sexennium, à priore, idem
 Religiosus, cum iam septuagesimum
 octauum annum ageret, retulit bene-
 ficium, Octavâ Iunij, Anno Domini

1674. cum grauis illum calculosa affectio inuasisset, neq; per totam ferè noctem somnū capere sinisset: recurrit ille, ad expertum olim remedium: mane postridie, cingulum Thomæ applicat: moxq; eadem die, grandi æquè ac antea calculo perfacile liberatur.

C A P V T XVII.

Alia quadam admiranda.

Apparuisse Thomæ ægro Sanctissimam DEI MATREM; supra, cū de deuotione eius erga Deiparam agerem, memorauī. Porro, fauorem huncce sibi præstitum, ipsemet Thomas, in Ephemeride Actorum quotidianorum, adnotauerat: adnotatum, se legisse, tunc eius Clericus, post Religiosus Cisterciensis Ordinis, Monasterij Claræ Tumbæ, Albertus Hæczel affirmatè narrauit, Paulo Stanislaos Smolicki: Scholastico Scarbiriensi: Præposito Neocorcinensi: qui
F demum

demum mihi totum vt audierat,
& à quo audisset, retulit. Neutri
fidem derogare fas est: quorum
alterum probatissima religiositas
alterum prudentia, grauitas, virtus
notissima, extra omnem falsitatis
suspicionem ponunt.

P. Stanislaus Chmielewicz, Vica-
rius Ecclesiæ Cathedralis Cracoui-
sis, retulit mihi: cum adhuc operam
literis daret, solitum se identidem a-
dire ædes Thomæ, vti benefactoris
sui. Quâdam porro die, cum horâ
prandij consuetâ, Thomas non com-
pareret, percontatum se, vbinam es-
set? & quid ageret? Tibi verò (inquit
Capellanus,) si libet, licet illa parua
ostij rimula contueri quid agat? In-
spexi: orantem extensis manibus vi-
di: quid viderim, exposui Tum Ca-
pellanus: atqui scito, inquit, eum
non terræ, non cuiuspiam alteri rei in-
sistere. Vehementia ignis in medita-
tione exardescens, in sublime actû,
ac ab

83
ac à terrâ leuatum significabat. So-
lebat vt plurimum in locis aspectui
hominum haud patentibus orare: vn-
de & in Ecclesia Cathedrali plerumq;
ad latus maioris altaris, spatio inter
aulæa, & parietē interiecto, abditus,
orationi vacabat.

Idem Vicarius narravit. Cū es-
sem iam Ordinibus minoribus initia-
tus, atq; vnus ex iis, qui sacro canta-
to modulatis intercinunt vocibus,
itare me quotidie ad Ecclesiam Ca-
thedralem necesse erat. Die ergo quā-
dam, cum versor in Ecclesiâ, sacerdo-
tis ad altare accessum operiens: ani-
maduerto excidisse mihi sacculum;
cum sex florenis. Mox relego vesti-
gia mea: huc atque illuc, qui memi-
neram me perrexisse, cursitans. Suum
tunc in Ecclesia, Thomas inter Cano-
nicos, occupabat locum: surgit: an-
xiè per Ecclesiam erranti occurrit;
angoris causam sciscitatur; paucis il-
lis; *ne sit solliciti*; solatur verbis. Tūc

postquā Kyrie eleyson cecinissent, me accersit, pecuniam amissam, reddit in eodem sacculo: & eandem ipsam, sed duplicatam: quippe supra amissam tantundem, accreuerat. Sex florenos perdiderat: duodecim recepit: factus iacturā auctior: nisi perdidisset; minùs habuisset. Id quod non potuit non tribuere extraordinariæ Dei prouidentia: suæ quidem indigentia: vt erat tunc tenuioris fortunæ, benignè prospicienti, serui autem sui sanctitatem, admirando hoc decoranti euentu.

C A P V T XVIII.

Mortui vitæ redditi.

EX admirandis supra vim & ordinem naturæ effectis, quibus Deus serui sui sanctitatem testatam, illustremq; reddere voluisse creditur: illud sermone omnium vel maximè celebratur: quòd per eum in villa, dictâ Skrzyнки, operatus est. Ludebant pueri supra stagnum propinquum: vnus

nus alteri pomum eripere nitebatur: dum neuter alteri concedit, dum spe potiundi, obstinato vtrunque, hie retinendi, ille extorquendi multiplicat conatus; seseque inuicem raptant, in iplo feruore puerilis luctu, alter eorum ex abrupta ripa crepidine, princeps in stagnum datus, profundis continuo absorbetur aquis. Tristi nuntio excita effunditur domus. Verum dum trepidè de modo succurrendi consultatur; dum haud facilè reperitur, qui periculum adire, ac voraces audeat inuadere aquas: dum urinator altæ voraginis scrutatur fundum; nec facilè reperit; & ægrè extrahit; amplius quàm integram horam, puerum sub aquis esse necesse fuit. Lustrabat eà tempestate pro more Diæcesim. Thomas: ac deo ita ordinante, in villam Skrzyнки venerat. Factum comperit, accurrit, exanime corpus reperit: indoluit, animo bono esse iussit, orauit, viuum puerum Parentibus

bus reddit: qui de ingrata recordatione beneficium recolentes; Deo & precibus Thomæ, reducem filij vitam semper referebant acceptam. Rem prout recenter gesta est; vir prudentiâ ac pietate insignis, Stanislaus Garwaski Canonicus Cracouiensis, in stato Conuentu apud Collegas suos primus vulgavit: Thomas, vti cætera, quæ admirationem æstimationemq; sui parere possent, totum constanti silentio pressit. In diario duntaxat, (quo memoriæ subsidio, vt erat accuratus in suis rebus, perpetuò vltus est) tacitâ suâ personâ, facti solitus meminit, paucissimis hisce verbis: *Hic puer submersus renixit.* At religiosissimus vir, P. Nicolaus Lancicius Societatis I E S V. & cum prudentiâ Sanctorum, omniq; eruditione spirituali; cuius Asceticorum eius operû Tomi duo, luculentissima specimina extant: tum verò vitæ Sanctimoniâ atq; admirandis per eum diuinitus patris

gratis operibus, non solum per Regnum Poloniæ, sed & apud exterarum nationes nominatissimus, is, inquam, miraculum restituti vitæ pueri, pro certo, compertoque habuit. Quippe scribens ad peramicum; perque familiarem sibi Casimirum Waxman, Warmiensem primum, dein etiam Cracouiensem Canonicum; multum ipsi gratulatus est, quod in ædibus (intelligebat eas, quas ob vicinitatē Ecclesiæ Cathedræ, studio à Thoma delectas, supra memoravi) ei successerit; qui mortuum puerum ad vitam reuocauit.

Compar priori miraculum, retulit, vir præstantis inter Collegas Cathedralis Basilicæ Cracouiensis Canonicos authoritatis, Ioânes Skarszewski; genere, virtute, prudentiâ, ac dexterritate in grauib; negotijs tractandis, Perillustri: quæ quidem illius decora, ideirco commemoro, quod dignitas dicentis, haud dubie fidem adstruat.

at dicti: Is igitur, cum cum ægrotum
 visitassem, narrauit mihi: alterum mor-
 tuum, in tractu Lublinensi, orationis
 & meritorum Thomæ interuentu vi-
 tæ redditum. Atq; hunc eundem esse
 arbitror; quem in villâ dictâ Pachna-
 Wola, prope Casimiriam. morti suæ
 superstitem. sospitemq; , visum a se,
 à nobili matrona Broniowska, sibi
 demonstratum, retulit mihi R. Pater
 Antonius Stephanowicz Custos Con-
 uentus Cracouiensis: nunc iam Pro-
 uincialis per Poloniam Ordinis Mi-
 norum de Obseruantia.

Tertium suffragio precum ac me-
 ritorum Thomæ diuinitus reuocatū,
 ad vitam mortui, patratum miracu-
 lum. tum ore tenus mihi retulit, tum
 accurato scripto consignauit illustris
 A.R.D. Adamus Drobczynski, Cra-
 couiensis ad Ecclesiam Omnium San-
 ctorum Canonicus, acceptā totius
 rei cognitione, ex Nobili Matrona
 Catharina Dzieżynska vidua, quæ
 cam

eam ex viro suo sibi tum adhuc con-
 uiuente (homine D E V M timente &
 per annos non paucos familiæ guber-
 nandæ, Oeconomixque tractandæ à
 Thoma in domo sua. præposito, eius-
 demq; viarum comite, nec non gesto-
 rum omnium scientissimo) narratam
 exposuit.

Sacramenti Confirmationis admi-
 nistrandi, aliaq; salutaria populis mu-
 nia obeundi gratiâ profectiorem,
 Thomas instituerat in eas Diæceseos
 regiones, quæ citra vltraq; Lublinum
 iacent. Operatus mane, pro quotidi-
 ano more sacris, iter ingressus, dua-
 bus confectis leuæis, diuertit in meri-
 diem ad hospitium, vbi minime læ-
 tæ speranti, accidit, offendisse Ma-
 trem familias vnigenitū vitâ recenter
 defunctum deplorantem, tanto dolo-
 re animi afflictam & turbatam, vt sa-
 lutantibus se hospitibus propter la-
 crymas & singultus respondere peni-
 tus nihil posset. Tanti doloris post-

quam Thomas causam intellexit, tac-
 tus commiseratione super ipsam, du-
 ci se ad mortuum iussit. Quo conspe-
 cto, & Matre à deliquio quod ex in-
 tuitu mortui filii passa fuit, vindicata,
 sic eam est consolatus: Noli flere, pu-
 er iste non est mortuus, sed dormit,
 vltus nimirum iisdem verbis, quæ
 Christus in suscitatione filia, princi-
 pis viurpauerat Matt: 9 opponente
 illa quòd diu animam egerit; ante a-
 liquot horas expirauerit: pallor, li-
 uorq; mortuum indicet, agroti in-
 quit dormietis signa ista esse possunt.
 Vade, iuua meum cocum, parantem
 pro familia cibos: conclaue claude-
 re iubet, claue[m] secum accipit. Dein-
 de egressus velut oraturus extra do-
 mum, aperit conclauis fenestram, ad
 locum vbi puer iacebat, se inclinat.
 Id verò solus maior illius domus vi-
 debat. Studio enim in egressu vnicui-
 que famulorum certas occupationes
 assignauerat, ne prodire extra domū,
 ac quid

91
ac quid fieret aduertere possent. Exa-
ctâ semihorâ fenestram claudit: re-
greditur: familiam accumbere iubet:
ipse interim orat: Matrem identidem
solatur repetitis verbis: non est mor-
tuus puer sed dormit. In ascensu cur-
rûs, dum clauim reddit, DEVS in-
quit te consoletur: illa gratias agit,
cûmq; numeratam pro pabulo equo-
rum alijsq; vsibus ad conclaue refert
pecuniâ, ecce conspicit in eo, in quo
iacuerat scamno sedentê filium amara-
no renidenti q; vultu, obstup. facta &
præ lætitiâ vix sui compos, confestim
ne compellato quidem filio prouolat
ad maritum, in horreo laborantem;
nuntiat filiolum vitæ restitutum pre-
cibus hospitis recentissimè profecti:
ergo protinus ambo cursu concito
Thomam consequuntur: assecuti, (ne-
que enim adhuc longè aberat, & haud
libenter quidem, sed clamoris post se
currentium precibus coactus sublite-
rat) flexis genibus, sublati in cælum
manibus,

manibus, lacrymisq; præ gaudio manantibus, in has erumpunt voces: ceterupliciter Tibi Reuerendissime repēdat Deus, quod nobis pauperibus afflictissimis impetraueris vnicum filium nostrum. viuit, viuit tuis sanctis precibus ad vitam reuocatus. At ille suboffensus eosq; arguens: sciuit inquit **D E V S** vitam eius adhuc esse necessariam, ideoque eum viuere voluit. Quod si vos precibus meis vitam eius tribuitis, breui morietur. Iussit deniq; vna cum filio pergere ad templum, ibiq; Deo pro accepto beneficio gratias agere; quod & continuò præstiterunt, modum, quo receperunt filium, ob comminationem Thomæ silencio prementes. Hæc fermæ ad verbum transtuli ex vernaculo scripto, prædicti **A R. D** Canonici perspectæ prudentiæ, fidei & integritatis viri, prout ab eo ex ore superstitis vsq; matronæ; & ab hac ex ore mariti proprii, qui rei gestæ interfuit, causas.

causas mentiendi procul habentibus,
excepta sunt.

C A P V T XIX.

Obitus.

Permolestâ calculosâ affectione,
quasi perpetuò, quòdâ vixit infe-
statum Thomam supra memorâram.
Eratq; hoc illi velut perpes, martyrij
instar, patientiæ exercitium. Verùm
extremis duabus septimanis, ita velut
collectis viribus inualuit; vt breui su-
premis admotum, violentè confece-
rit. In summâ acerbitate dolorum,
illud Apostoli vsurpabat. *Quotidie mor-
tor.* Qui humano sensu dinitatem cru-
ciatuû eius expendisset, miserrimè il-
lum, & velut irato numine decedere
ex hac vita iudicasset. At qui fidei lu-
mine illustrati, ac Sanctorum pruden-
tiâ præditi, interiores oculos simili-
bus euentis admouent, longè diuersa
sentiunt: penitusq; ex vero censent,
Deum, non solùm, non irasci, verùm
etiâ

etiam eximium fauorem præstare; cum
 quos diligit castigat: cum tenuissimas
 etiam noxas igne tribulationis hinc
 excoquit: nec purgatorijs furnis ex-
 piandas remittit: eum ut merita ac-
 cumulet, flagella multiplicat. Sed ec-
 ce dum hæc animo voluo; eo ipso
 die, quo sancti Francisci Xaverij In-
 diarum Apostoli transitus ad vitam
 cælestem, anniuersariâ memoriâ, re-
 currit, affine quiddam mentis occur-
 rit cōsiderationi: huius ipsius, inquā,
 magni serui Dei, si animalium homi-
 num, ea quæ Dei sunt, haud percipi-
 entium, iudicio rem permittas; per-
 quam miserandus; sin eorum, qui ad
 fidei lumen, in arcana etiam Dei con-
 silia, quantum fas est, humanæ im-
 becillitati, aciem intendunt; per-
 beatus: & ut utrorumque iudicia
 tam longè dissita coniungam;
 est infelicissimus exitus. Quippe ille,
 post tempora Apostolorum, Apo-
 stolus (absit verbo inuidia) maximus;
 qui,

qui, (liceat Tulliana verba longè ver-
 ri^o in præsentiarum vlturpare:) gentes
 immanitate barbaras, multitudine
 innumerabiles, locis infinitas; non
 eruentis cædibus domuit, sed gladio
 spiritus, quod est verbum Dei, sub
 suaue Christi iugum misit: qui manu
 propriâ duodecies centena Ethnicorū
 millia fonte baptismi Sacro abluit: il-
 le qui tot mōtuos, (non pauciores quā
 viginti in Actis Canonizationis pro-
 feruntur) ad vitam reuocauit: ille de-
 mum plurimorum aliorum. (quis e-
 nim omnia enumeret?) maximorum-
 que ad Maiorem Dei Gloriam facino-
 rum, ac prodigiorum patrator; dum
 quæ retro sunt obliuiscens, ad anteri-
 ora desiderijs propagandi Rēgnū
 Christi in immensum se extendit;
 dum Sinarum vastissimo, & populo-
 sissimo imperio lucem Euāgelij in-
 ferre ardet; dum atrium à forti ar-
 mato longa retro seculorum serie in-
 fessum invadere, claustraq; ferrea, in-
 exupe-

exuperabilibus legum, ingressum exteris sub ineuitabili capitis vel carceris perpetui pœnâ vetantium, vsusque perpetui feris firmata, vel vitæ impendio percurrere nititur. In hoc tam grandi, contentoq; conatu, tantus Dei seruus, lethali correptus morbo; nec desiderijs minùs importandi Sinis nominis Christi, quàm febribus æstuans, in horrente illâ, vacuæ habitatoribus insulæ solitudine, ^{in tugurio} ventis pervio, ac penè sub diò: omni humano destitutus solatio moritur. Nunquid igitur à Deo quoq; desertum, abiectumq; putabimus? Absit à Philosophiâ Christianâ ita arbitrari; ex cuius sapientissimis sensis, ac Sanctissimis placitis, & cum Sâctorum, tum Sancti Sâctorum Magistri cælestis Iesu Christi, exemplis & doctrinis, certum est fidelibus; id quod in præsentia est, momentaneum & leue tribulationis nostræ, supra modum in sublimitate æternum gloriæ pondus opera-

operari: ideoque; desolationes, in
maiora incomparabili excessu solatias;
ignominiam in gloriam; labores in
præmia; certamina in triumphos, co-
ronasq; vertere immarcescibiles: de-
num quò electorum quisq; largius
bibit de calice passionis; deq; torrente
tribulationum, eò altiùs extollere ca-
put, propioremq; Christo in regno e-
ius considerare. Atque hoc ipsum (ut
ex diuerticulo, quanquam affini viâ,
ad viam ipsam redeamus) iustum est
sentire de Thoma Oborski; Deum
videlicet benigno paternæ providen-
tiæ consilio, extremis vitæ diebus,
acerrimis ipsum attrinisse doloribus,
quò expiatis minimis etiam, quas nec
magna sanctitas effugit, labeculis,
expeditam illi, rectamque ad cælum
panderet viam: quò cumulatoribus
conspicuis meritis, gloriosior intra-
ret in gaudium Domini sui, honorati-
oreque, cælestis conuiua, æternum
recuberet loco. Fuit is illi sanè mor-

bus, nobilis præstantium virtutum
 palæstra: meritorum officina: fuit
 cursus ad brauium supernæ vocatio-
 nis: instar quidem motus grauium
 corporum naturalis: eò citior; quò
 metæ propinquior. Viua viuaxque
 fides, deuotionis feruor, exacta pro-
 priæ voluntatis cum Diuina consen-
 sio, virginalis verecundia, inuicta in-
 ter acerrimos dolores patientia, cæ-
 terusque præcellentis gratiæ Diuinæ
 comitatus, si quando, in vltimâ hac
 vitæ scenâ, rarâ maiestatis specie com-
 paruere. Cùm adhuc inter spem &
 metum ancipites medicorum senten-
 tiæ fluctuarent, vnus aliquis solerti-
 or, spondebat se certis instrumentis
 radicem mali educturum. Renuit
 heroico animo Thomas: eò maximè
 nomine, quòd ratio medendi, quan-
 quam licita, pudori suo virgineo haud
 congrueret. Vbi supremis propiùs
 sese iam admoueri sensit, suprema Sa-
 cramentorum præsidia cupidè expe-
 tijt.

vijs. Venientem ad se in Eucharistia
 Dominum, eâ excepit deuotionis ala-
 critate, quæ piam præsentibus ciceret
 admirationem, afflaret pietatem. Et
 de morte quidem propriâ, non secus
 ac de alienâ loquebatur. adeo præ-
 sens sibi, Deo fidens, tranquillus-
 que in eo articulo constabat ipsi ani-
 mus. Eâdem pace animi ordinatis;
 quæ ex vltimo arbitrio eius post obi-
 tum fieri seu iustitia seu pietas posce-
 ret; totus de cætero in Deum & Diui-
 na ferebatur. Demum inter religio-
 sissimos sensus & suauissima collo-
 quia, cum IES V; in cuius effigiem
 quasi assiduè intentos habebat ocu-
 los, sensim viribus, ac voce defi-
 cientibus, cômēdatissimâ haud

dubiè tot benefactis ani-

mam, in manus fi-

delis tradit Creato-

ris. 3. Iulij A.

D. 1644. 2.

tatis 74.

G 2

CA.

C A P V T XX.

Opinio Sanctitatis.

HAud ignoro, laudatis etiam scriptoribus in more esse: posteaquā & merito sui, & iudicio Saluatoris tertiora Sanctitatis documenta, opera, inquam bona, primo loco, tum secundo admiranda in medium protrulere; postremò tandem voces etiam populi, ac prudentum iudicia, velut non contemnenda adstruendæ Sanctitatis instrumenta studiosè collecta adducere: quorum uti diligentiam laudo; ita contentionem laboris, haudquaquam assequi me posse confido. quippè infinitum, ac ferè superfluum videtur, singulorum sententias particulatim per censere: ubi ex omnibus, qui diffiteatur: nemo est: promptè annuunt cuncti. Thomam quicumq; penitus nouerant, pro Sancto habebant, ferebantq;: vulgò Sanctus Suffraganeus vocabatur. Hinc qui etiam sacris ab eo Ordinibus initiati sunt, in par-


in parte id felicitatis, & gloriæ, me-
cum ponunt. Non minimū commu-
nis de Sanctitate cuiuspiam sensus in-
diciū est, honor sepulturæ, & pia
veneratio rerum attinentium eos,
quorum sanctitatem, multū, vulga-
rem excessisse modum, factorum fa-
mæque celebris testimonio, nobis
persuademus. Quam in rem, memo-
ratus P. Sophronius, hisce verbis, de
Thoma scripsit ad me. Cum opinio-
ne Sanctitatis mortuus est: quod con-
cursus multorum, loculum corporis
eius tangere volentium, dum ferretur
ad sepulcrum indicabat. Premebant
nos, qui obsequium illud præstabamus
defuncto, & strophis attingebant vr-
nam, illa deinceps tanquam reliquias
habitori. Ex reculis quoque illius,
vnusquisque aliquid cupiebat habere.
Hactenus ille. Eadem præcel-
lens opinio sanctitatis, exciuit mox
ab obitu, præstantium doctrinâ & pi-
etate virorum, linguas ac calamos.

ad dicendam memorie posterorum
 Thomæ vitam. Primus hanc lucu-
 lentâ oratione celebravit Simon Sta-
 rowolski Canonicus Cracouiensis;
 promptus oppidò & copiosus in rem
 Ecclesiæ & Patriæ Scriptor. Habe-
 tur typis edita, in libro Vitarum E-
 piscoporum Cracouiensium ab ipso
 conscriptarum; loco postrema, fa-
 cundiâ, eruditione, prolixitate, stu-
 dio, contentioneque dicendi prima.
 Erexit eidem gentilitiam Columnam
 celebris, inclytæ Academiæ Cracoui-
 ensis Orator, Ioannes Cynerski; non
 ex Pario eductam marmore, aut ære
 fusam Corinthio, verum ex præstan-
 tium Thomæ virtutum meritissimis
 elogijs panegyrico opere affabrè con-
 structam. Scio quendam grauem &
 doctum virum, pridem molitum fu-
 ille opus vitæ Thomæ, non sine gran-
 di ut arbitrabar si in lucem prodijisset
 operæ pretio, quippe cum cætera scri-
 ptoris dignitas, tum iurati officij au-
 ctori.

ctioritas, testatiora haud dubie red-
 didisset gesta Thomæ. Verum mors
 interueniens, cum auctore opus quo-
 que sustulit, quæsitum post obitum,
 non inuentum. Casu, an consultò,
 notitiæ aliorum subductū fuerit? non
 constat. Altero à sepultura die pa-
 rentatum est Thomæ in Basilica SS.
 Petri & Pauli Apostolorum. Lauda-
 uit è suggesto, religiosâ oratione, ad
 vsum audientium salutarem, maximè
 accomodatâ, P. Valentinus Sophro-
 nius: qui vti in propriâ perfectione
 curanda studiosus, ita in alienâ solers,
 & perspicax pernoscendâ, cum per
 triennum comes Apostolicarū Tho-
 mæ peregrinationum, sociusque la-
 borum fuisset; non potuit non mul-
 ta particularia nôsse, quæ ad spiri-
 tualem Religiosi auditoris gustum
 gratissima acciderent. Parentatum
 est, & in alijs Societatis domicilijs:
 quo officij genere, tametsi amicitia,
 & gratitudini, erga amicum & bene-
 facto.

factorem; præcipue tamen litatum
 est sanctitati. Atque hæc dicta com-
 pendiosè sunt; de magnis, THOMÆ
 OBORSKI, Episcopi Laodicensis,
 Suffraganei Cracouiensis virtutibus:
 quæ faciant manifestum, cum fuisse
 immunem, ab illa notâ, quæ cuidam
 Angelo Laodiceæ tribuitur; *Apoc: 3.
 v. 16.* Faxit DEVS: vt sui quam-
 plurimos in Ecclesia DEI habeat
 imitatores. Amen.





E I D E M

P E R I L L V S T R I

Et

REVERENDISSIMO DOMINO

D. NICOLAO

OBORSKI & c.

ACCINIT

Congregatio B. M. V.

In Cælos Assumptæ

Ad Domum Prof. Soc: IESV Crac:

V T S V O

Consodali fæderatissimo &
obseruandissimo

Teriam Praefecto vigilantissimo,

G s

A C

AC
PERILLVSTRIS

Et

Reuerendissimi Domini p. m.

THOMÆ

O BORSKI,

Eiusdem Sacri Cætûs,
quaternis vicibus

Præfeti munificentissimi,

NEPOTI DIGNISSIMO,

Suarumq; virtutum Hæredi

ÆMVLATISSIMO.

Nam quo sagacis publica dignius
Se vertat Orbis palpebra? quo
Aureo

Temone subnixus, volantes
Flectat equos, teneatq; cursum.
Ar-



Ardens tueri grandia Cynthius?
Non ille, quamquam per populos eat
Lustrator immensos, theatro.

Se meminit potiore totos
Impleſſe vultus. ſurgis? an abditum;
Modestiori tegmine adhuc premis
Nomenq; , Laudemq; emicantis.

De tumulo fugitinus auræ?
Latere Virtus nescia diſijcit
Fatale marmor, triftibus inferi
Odit cupreſſis, perq; buſta &
Per medias bene fulget vmbras.

Digna ô Latini Portio Sanguinis
OBORSCIORVM Gloria, Præſulum
Numen, Columnarum Columna,
Magne Viris ſuperiſq; THOMA!

Infueſce tandem Nominis inclyti
Perofus olim ferre meridiem.

Infueſce, Nobilemque Cætis
VIRGINEI, meritâ vetare
Deſiſte gazam luce. Quid hic priùs
Miretur cælum? quantus in indigos,
Tagus redundas? quantus alta,
Te facilis domuiſſe, curas.

Cal.



Calcare fastûs lubrica? quàm vigil
Commisſa luſtras Paſtor Ouilia?
Victumq; , vitam, & Thaumaturgâ
Munificus properare dextra?
Ad grandiores quid male pagina
Obnubit auſus? viuus, & oblitis
Nil preſſus vrnis, haud minori
Pæne Tuam potes in Nepote
Lucem tueri. ſpirat adhuc DEVM.
Vultus; nec altæ Nube modèſtiæ
Sat reſta virtus, perſpicaces
In ſe oculos animoſque figit.
An & Sodalis VIRGINEIS ades
Præſq; Magnus Cætibus? Inuida
Nil egit Atropos, vetas Tu
Magne mori NICOLAE THOMAE.
ſic ille vultus, ſic oculos tulit
Manuſq; Præſul, qualis in omnium
Verſaris ore, ô digne iungi
Sero Comes NICOLAE, THOMÆ.



E R R A T A.

In epist. dedicat. & alibi sæpius *pro*
Præsbytero leg potius Presbyterum
pag. 10. v. 4. Irato stetit. leg. irrito
euentu.

pag. 4). v. 17. prægraute, lege prægra-
uante.

pag. 56. v. 7. subministrandis leg. sub-
ministrandis.


pag. 64. v. 1. Nec maxima subsistunt,
leg. nec maxima nec minima.


pag. 77. v. 9. intercessione obtentam
leg. intercessione eius.


pag. 80. v. 2. vt suprema leg. vt ad
suprema.


pag. 94. v. 22. e infelicissimus leg.
felicissime infelicissimus.

pag. 96. v. 11. ventis perurio. leg. in
tugurio ventis perurio.









Biblioteka Jagiellońska



stdr0024522

